

1 Corintios

Paulo Cohamacu yainare Corinto macainare joarocaha

¹⁻² Yuhu Paulo, Jesucristo yare buhe duti to cūriro jija. Cohamacu to cahmano seheta Jesu to cūhtiro cjihtore beseri jire yuhure tiro. Sostene wama tiriro mehne musare Cohamacu yainare Corinto macainare joarocaja sã. Ahriro cãhu mari coyeiro Jesu yairo jira. Jesucristo mehne macaina musa jichu Cohamacu yaina cjihti beseri jire Jesu musare. ã yoa jipihtina paina mari puhtoro Jesucristore siniina jia, tina cãhu Cohamacu yainata jira. Ti ã jichu Jesucristo sehe mari jipihtina puhtoro jira. ã jina musare jipihtinare joarocaja sã. ³ ã yoa Cohamacu mari Pucu mehne, mari puhtoro Jesucristo mehne musare noa dutija. Cohamacu to yoadohoa mehne noano jiga musa.

Jesucristo sehe musare noano yoabasaha Cohamacure

⁴ Jesucristo yaina musa jiri baharo tiro sehe musare noano yoabasari jire Cohamacure. To ã yoabasachu ñucu, Cohamacure “Noana”, nirucuja yuhu dachoripe. ⁵ Cristo yaina musa jichu ñano Cohamacu sehe musare noano jichu yoari jire. Tuhsu, to yare musare painare noano yahuhtina cjihtire yoari jire tiro. ã jiro tiro to yare noano masichu yoari jire musare. ⁶ Cristo yare musare sã buheriro seheta ã yoari jire musare, Cristo yaina musa wahachu. ⁷ ã yoa Cohamacu musare

noano yoadoho pahñonocanoahca. Mari puhtoro Jesucristo ahri yahpapu to tjua tahtore musa cohtaro watoi Cohamacu musare ã yoadohorucurohca. ⁸ Cohamacu musare yoadohorohca to yare musa ne duhuerahito sehe. To ã yoachu musa sehe dachoripe, ahri dacho pihtichupu cãhure ñaa buhiri marieina jirucunahca, Cohamacu to ñichu. Ñ jina Jesucristo mari puhtoro to tjua tachupure ñaa buhiri marieina jinahca musa. ⁹ Tíre Cohamacu to niriro seheta tiro yoara. Tiro to macano mari puhtoro Jesucristo yaina cjihtire marine beseri jire. To ã beserinare Jesu yaina jichu yoare marine.

Jesu yaina Corinto macaina cahmachua cahma sayoha ti basi

¹⁰ Yu coyea, mari puhtoro Jesucristo to dutiro mehne musare tuaro mehne yahui tai nija ahrire: Musa basi cahma sayoena tjiga. Ñ yoa musa basi cahma tju wa dapo jiena tjiga. Cã curuaihta jiga musa. Ñ jina jiape ni durucuena tjiga musa basi. Ñ yoana musa yoahito cjihtore tãhotuna, cãno potorita yoaga musa. ¹¹ Yu coyea, musa basi cahma sayona niyuhca musa. Ñ ni yahure cãina Cloé ya wãhu macaina yãhure.

¹² Cãina musa mehne macaina õ sehe ni cahma sayoyuhca: “Paulo ya curua macaina jija sã”, ni cahma sayoyuhca cãina musa. Ñ yoa paina “Apolo ya curua macaina jija sã”, niyuhca tina cãhu. Paina sehe tjoa “Pedro ya curua macaina jija sã”, niyuhca tina cãhu. Paina sehe tjoa “Cristo ya curua macaina jija sã”, niyuhca tina cãhu. ¹³ Musa ã nipachuta Cristo yaina cã curuaihta jija mari.

Mari basi cahma tju wa dapo masieraja mari. Cũ curuaihta jija mari. Yũhũ Cristo jieraja. Tiro yoaro sehe mũsa ya buhirire crusapũ yariariro cjiro jieraja. Tuaa maeraja. Ã jicũ wiho jiriro jija. Ã yoa mũsare paio bautisaro, Cristo yaina mũsa jichũ mũsare bautisari jire. Yũ yaina mũsa jichũ sehere mũsare bautisaerari jire. (Ã jina yũhũ sehere ñũ wahãena tjiga mũsa.)

¹⁴ Mũsare, mũsa mehne macaina cãhũre bautisaerahi yũhũ. Crispore, Gayo cãhũre tina dihtare bautisahi. Paina sehere bautisaerariro yũ jichũ noana, yũ tũhotuchũ. ¹⁵ Payũ masare bautisariro yũ jichũ “Paul yaina sã jichũ bautisare sãre”, ni ñũ wahãboa mũsa yũhũre. Ã jicũ tíre mũsa yoachũ cahmaeraja. ¹⁶ Estéfana ya wũhũ macaina cãhũre bautisahi yũhũ. Tópeinata bautisahi yũhũ. Yũ bautisarinare painare wacũeraja yũhũ. ¹⁷ Cristo yũhũre warocaró, masare bautisahtirore cũerare yũhũre tiro. Noaa buheare buhehtiro sehere yũhũre cũre. Cristo crusapũ to yariarire mari buhechũ tí buhea marine noaina wahachũ yoara. To ã yoapachũta noaa buheare yũ mũ sũro yũ buhechũ yũhũ sehere ñũ wahãboa mũsa. Mũsa ã ñũ wahãna noaa buhea sehere ño payoeraboa mũsa. Tuhsũ noaina wa-haeraboa. Ã jicũ Jesu ya buheare buhecũ yũ mũ sũro yũ masia mehne buheraja yũhũ.

Cohamacũ to tuaa cãhũre to masia cãhũre cjariró jira Cristo

¹⁸ Pichacapũ butihtina sehe Cristo crusapũ to yariarire mari yahuri buheare “Tũho masieraina ya buhea jira tí”, nimana butihtina sehe. Mari sehe Cristo to yũhdũchũ yoahntina cjihti jina õ sehe

nija: “Crusap_u to yariarire mari yahuri buhea tí waro jia nina. Tí buhea Cohamac_u to tuaare yahura marine”, nija mari. ¹⁹ Cohamac_u sehe to yare ti joari pūi ō sehe nina:

“Ahri yahpa macainare ‘Noano masiina jira’, ti niinare ti masia yaba cjihti jierach_u yoaihca y_uh_u”,

nia tiha Cohamac_u to yare ti joari pūi.

²⁰ Ā jia ahri yahpa macaina noano masiina ti masia yaba cjihti jierara. Sã coyea judio masare buheina cãh_u ti masia yaba cjihti jierara. Mip_ure ahri yahpa macaare durucu sayo mihniina cãh_u ti masia yaba cjihti jierara. Ahri yahpa macaina noano masiina ti jipach_uta quihōno masieraina ti jirire masich_u yoare Cohamac_u. ²¹ Cohamac_u pinihta noano masiriro jira. To ã jich_u ahri yahpa macaina ti ya masia mehne Cohamac_ure ne masierara tina. Cohamac_u to masi dutieraro seheta ã wahare tinare. Cohamac_ure cahmaeraina sehe ō sehe nina noaa buhea warore: “T_uho masieraina ya buhea jira”, nimana. Ā jia noaa buheare “T_uho masieraa buhea”, ti nia buheare t_uhoa Cristore masi d_ucara masa. Ti ã masi d_ucach_u Cristore ti wac_u tuach_u ñ_uno tinare pichacap_u wahaborinare y_uhd_uch_u yoara Cohamac_u.

²² Judio masa Cohamac_u to tuaa mehne to yoa ñorire ñ_u dua nina. Ā yoa griego masa judio masa jieraina sehe noano ti masihti cjihtire macaa nina. ²³ Mari sehe Cristo crusap_u to yariarire yahuri buheare buheja mari. Tí buheare judio masa sehe ñ_u yabira. Ā yoa tí buheare judio masa jieraina sehe “T_uho masieraina ya buhea jira”, ni t_uhotura.

24 Ti ã ni t̃hotupach̃ta Cohamac̃u to yaina cjihti to beserina sehe tí buheare õ sehe nina. “Cristo ya buhea Cohamac̃u to tuaare, to noano masiare masich̃u yoara marine”, nina tina ahri buheare. Tina judio masa, judio masa jieraina jipahta, ã nina Jesu yaina. 25 Cohamac̃u masi pah̃ñoriro jira. “Tiro t̃ho masierariro jira”, masa ti ni t̃hotupach̃ta ahri yahpa macaina ỹhdoro noano masi pah̃ñoriro jira tiro. Tuhs̃u Cohamac̃ure “Tuaerariro jira”, masa ti ni t̃hotupach̃ta ti bui tua ỹhdur̃uca s̃ariro jira tiro.

26 Ỹu coyea, Cohamac̃u m̃sare to yaina yoach̃u m̃sa paỹu wiho jiina m̃sa jirire wac̃ga m̃sa. Ahri yahpa macainare “Noano masiina”, ti niinare mahainac̃ã Jesu yaina cjihtire beseri jire Cohamac̃u. Tuhs̃u p̃h̃toa c̃h̃ure mahainac̃ã Jesu yaina cjihtire beseri jire tiro. ã yoa p̃h̃toa pohna c̃h̃ure p̃ha pohna c̃h̃ure mahainac̃ã Jesu yaina cjihtire beseri jire tiro. 27 “T̃ho masieraina jira”, ti niinare Cohamac̃u beseri jire “Noano masiina jira”, ti niina ti b̃oro wahahto cjihto sehe. Tuhs̃u “Yaba cjihti jierara”, ti niinare Cohamac̃u beseri jire, “Wiho jiina jierara”, ti niina ti b̃oro wahahto cjihto sehe. 28 Masa ti ñ̃u yabiinare “Yaba cjihti jierara”, nina masa. Ti ã nirinare Cohamac̃u to yaina cjihtire beseri jire tinare. ã besero “P̃h̃toa waro jira”, ti niinare wiho jiina ti jiare masich̃u yoari jire Cohamac̃u tinare. 29 To ã yoach̃u ñ̃u ahri yahpa macaina ne c̃ãiro “Tuariro, noano masiriro jija”, ne ni ỹhdur̃uca masierara, Cohamac̃u to ñ̃uch̃u.

30 Cohamac̃u sehe marine Jesu yaina jich̃u yoare. To yaina jina marine to ỹhduch̃u yoari

baharo jipihitia dachoripe Cohamacu mehne jirucunahca mari. Jesucristo sehe Cohamacu yare noano masichu yoara marine. Tuhsu mari ñaa buhirire cohãna. Ñ yoaro mari ñaa yoari buhirire cosaro, marine “Noaina jira”, to ni ñuchu yoara Cristo Cohamacure. Ñ yoaro marine pichacapu wahaborinare yuhduchu yoara. ³¹ To ã yoachu Cohamacu yare ti joari pui to ni joariro seheta ã wahara: “Yu mu saro masi pahñoriro jija’, niriro tíre nieno tjjjaro. Ñ sehe nijaro: ‘Mari puhtoro Cristo sehe marine yuhduchu yoariro jira’, nijaro tiro”, nina Cohamacu yare ti joari pui.

2

Cristo crusapu to yariarire sã yahuri buhea jira ahri

¹ Yu coyea, musa cahapu sucu “Noano masi pahñoja”, musare ni buherahi. Cohamacu yare musare buhecu, tó sehe ni buhecu nierahi. ² “Ñ sehe ni buheihitja”, nicu musa mehne jicu Jesucristo ya dihtare crusapu to yariari dihtare wacucu, tí buheare buhei yuhu. ³ Tuhsu, musa mehne jicu wiho jiriro yoaro sehe jii yuhu. Ñ jicu Cohamacu yare quihõno buhe duariro jicu cuiriro tetereriro yoaro sehe jii yuhu. ⁴ Ñ jicu Cohamacu yare buhecu, “Masi pahñoja”, ni buherahi. Mijoa durucua mehne yu mu saro buherahi. To yare yu buhechu Espiritu Santo to tuaa mehne yu buhechu ñure musa. ⁵ Ñ seheta ni buhei yuhu musare masa ti mu saro ti buhea sehere musa cahmaerahto sehe. Cohamacu sehere musa wacu tuahtore ã ni buhei yuhu.

Espíritu Santo sehe Cohamacu to jia tiare buhera marine

⁶ ã jina Cohamacu ya buheare musare Jesure noano masiinare yahuja sã. Masa ti mu sũro ti buhea yoaro sehe jierara ahri musare sã buhea. Ti puhtoia ya buhea cãhu jierara. Tina sehe pihtia wahaahca. ⁷ Paina ti masierari cjirire Cohamacu ya durucua cjirire yahuja sã sehe. Panopure ahri buheare Cohamacu yaina cjiri noano masi pahnoerari jire. Ahri yahpa to jihto pano ahri buhea ti niriro seheta “Ãta wahajaro”, ni tuhsua tiri jire Cohamacu. Marine pichacapu waha-borinare to yũhdũchu yoahto cjihtore, tiro mehne mari jirucuhto cjihtore, tiro yoaro seheta mari wahahto cjihto cãhure. “Ãta wahajaro”, nia tiri jire tiro. ⁸ To ã nichu Cohamacure cahmaeraina puhtoia ne to buheare tuho duaeraa, masierari jire. Tĩre noano masia, mari puhtoro Cohamacu macuno warore crusapu cã puha wajãeraboa tina.

⁹ Cohamacu yare ti joari tjuĩ õ sehe nina:

“Jipihtina Cohamacure cahĩina ya cjihtire Cohamacu noano cahnobasa tuhsua.

Noa yũhdũara tí to cahnobasari.

Tí to cahnobasarire mari ne ñũerana, tuhoerahi.

ã jina ‘õ sehe yoarohca Cohamacu’ ni, dohse masiyu pahnohto basioerara marine”,

nina Cohamacu yare ti joari puĩ. ¹⁰ To ã nipachuta Espĩritu Santo Cohamacu yare masichu yoare marine. Jipihtia Cohamacu yare Espĩritu Santo masi pahnoa. ã masino tiro marine tíre masichu yoara.

¹¹ Ne paina sehe masuno to masiare masierara. Wiho mejeta masuno sehe to basi to wacũapu to

tuhotuare masina. Tó seheta paina Cohamacu to masiare ne masierara. Cohamacu to Espiritu Santo dihta to masiare masina, masuno to basi to tuhotuare to masino seheta. ¹² ã yoa mari sehe Jesu yaina jina masa ti mu suro ti buheare cjaeraja. Cohamacu to Espiriture ware marine masichu yoaro taro. Tiro marine to noano yoahore masichu yoara Espiritu Santo sehe. ¹³ Cohamacu yare musare buhena, masa ya masia mehne sa mu suro buheraja sa. Espiritu Santo to buhea sehere musare buheja. ã buhena Espiritu Santore cjuainare Cohamacu yare noano buheja sa.

¹⁴ Espiritu Santore cjaeraina sehe Espiritu Santo yare ne cahmaerara. “To ya wiho warota jira”, nimana tina. Espiritu Santo to yoadohoro marieno ne to yare masihto basioerara masare. ã jia tina to yare ne masierara. ¹⁵ Espiritu Santore cjuaina sehe Cohamacu yare noano masina. ã jia jipihtiare noano bese masina. Paina sehe tinare “Noaina jira. Ñaina jira”, ni bese masierara Espiritu Santore cjuainare. ¹⁶ Õ sehe nina Cohamacu yare ti joari pui: “Mari puhtoro Cristo to tuhotuare masiina ne mariahna. ã yoa tirore masa ne ‘Õ sehe yoaga’, ni masierara”, nina to yare ti joari pui. Mari sehe Cristo yaina jina, Cristo yoaro seheta masija mari.

3

Jesu yaina cano potori Cohamacure dahra cohtaina jira

1-2 Y_u coyeya, m_usare buhec_u Espíritu Santore noano y_uhtiinare y_u buheriro seheta buhe masierahi m_usa sehere. Cristo yaina jipanahta, wihāinacā ti wahiquiro dihirore ti ch_u masierariro seheta Cohamac_u yare noano masierare m_usa. Mip_u cūhare noano masierasiniyuhca m_usa. Ā jina wihāinacā pēchore ti pūno seheta mijoera curea buhea dihtare t_uhoyuhca m_usa. Ā jic_u tó sehe jia buhea dihtare buhei m_usare. Cristo yaina jipanahta wihāinacā ti ch_u masierariro seheta Cristo yare noano masierayuhca m_usa. ³ M_usa sehe m_usa mehne macainare ti noano wahach_u ñ_una ñ_u tuhtina, cahmachena, m_usa basi cāa curuari tju war_uc_u s_una, Espíritu Santore c_umaeraina yoaro sehe yoana niyuhca m_usa. Ā yoana ahri yahpa macaina Cristore cahmaeraina yoaro sehe yoayuhca m_usa. ⁴ Ō sehe niyuhca m_usa: “Paulo mehne macaina jija sã”, niyuhca cāina m_usa. Ā jia paina m_usa mehne macaina sehe “Apolo mehne macaina jija sã”, niyuhca. M_usa ā ni durucuna Espíritu Santore c_umaeraina yoaro sehe ni durucuna nica m_usa.

⁵ ¿Y_uh_u Paulo, Apolo mehne dohse yoahtina c_uj_uhti jijari sã, m_usa t_uhotuch_u? Ō sehe yoahtina jina nija sã: Cohamac_u to dutiriro seheta tirore dahra cohtaina wiho jiina jija sã. Ā jina m_usare sã buhech_u t_uhona Jesucristore wacū tua d_ucare m_usa. ⁶ Noaa buheare buheina wesep_u dahraina yoaro sehe jira mari piti dahre buhech_u. Wese p_uro to toa m_uhtariro seheta y_uh_u cūh_u m_usare buhe m_uhtahi. Tuhs_u, paio wesere to cure n_un_u tiriro seheta Apolo sehe y_u baharo m_usare

buhe namo nunu tire. Sã ã buhepachuta wese macaa toaare bucha namochu to yoariro seheta Cohamacu sehe musare to yare masi namochu yoahre. ⁷ ã jichu yuhu buhe muhtariro jipaihta wiho jiriro jija. ã jiro Apolo yu baharo buhe nunu tiriro cūhu wiho jirirota jira. Cohamacu pinihta toaare to bucha namochu yoariro seheta to yainare tireore masi namochu yoara. ã jiro Cohamacu sehe wiho jiriro jierara. ⁸ Toa muhtariro, baharo cure nunu tiriro cāno potori dahra cohtaina wiho jiinata jimana tina. ã jia ti dahrariro purota wapatara tina. Tó seheta jija sã, Apolo mehne. ⁹ ã jina sã Cohamacu yare dahra cohtaina jija. ã yoa Apolo yu piti jira. Sã ã jichu musa sehe Cohamacu ya wese yoaro seheta jira. Musa ã jichu Cohamacu wese macaa toaare to bucha namochu yoariro seheta musare to yare masi namochu yoarohca tiro.

ã yoa Cohamacu musare to yainare noari curua yoaro nina. ã jina tãa mehne ti yoari wuhu yoaro sehe jira musa to ya curua macaina mari piti dahre buhechu. ¹⁰ Musa ã jichu Cohamacu yuhure to dutiriro seheta yuhu sehe wuhu dahre mih-niriro tãare to cū muhtariro seheta Jesucristo yare musare buhe muhtai. ã jiro tí tãa bui pairo to yoa namo mujariro seheta pairo yu baharo buhe namo nunu tiro nina. ã buhe namono noano yoaro cahmana. Ne papero marieno noano buhejaro tiro. Cristo ya dihtare buhejaro tiro. ¹¹ Wuhure ti dahre dūca ti cū muhtari tãa yoaro sehe Cristo jira. ã jina tí tãare sã noano cū muhtariro seheta Cristo yare buhe tuhsai. Pairo ya buhea sehere

mari buhech_u tó wahaerara. ¹²⁻¹⁵ Uru mehne, plata mehne, wapa b_uj_ua tãa mehne mari yoari w_uh_ure mari j_u ñ_uch_u j_uerara. Tó seheta Jesucristo yare mari noano yoari baharo pihtiri dacho jich_u Cohamac_u mari yoarire to j_u ñ_uno seheta yoarohca mari yoarire masino taro. Tó sehe to yoach_u noari w_uh_u to j_uerariro seheta mari yoarire ti noaa jich_u masinohca. Ñ yoaro mari noano yoarina mari jich_u masich_u yoarohca tiro. Noaare mari yoari wapa noano yoarohca marine. Yuc_uri mehne, tja mehne, ñaia p_uri mehne mari yoari w_uh_ure mari j_u ñ_uch_u j_ua waharohca. Tó seheta Jesucristo yare mari noano yoerari baharo pihtiri dacho jich_u, Cohamac_u mari yoarire j_u ñ_uno sehe yoarohca mari yoarire masino taro. Tó sehe to yoach_u ñari w_uh_u to j_ua wahariro seheta mari yoarire ñaa ti jich_u tiro masinohca. Ñ yoaro mari noano yoaeraina mari jich_u marine masich_u yoarohca tiro. Noano yoaeraina mari jich_u ñ_uno noaare mari yoamari wapare noano yoasi. Tó sehe j_uinare Cohamac_u y_uh_ud_uch_u yoarohca. To ã y_uh_ud_uch_u yoapach_uta tó sehe noano yoaeraina mahanocã cohõbo cure y_uh_ud_uh_uca.

¹⁶ M_usa sehe Jesu yaina Cohamac_u ya w_uh_u yoaro sehe jira. M_usa ã jich_u ñ_uno tí w_uh_ui to jiboro seheta Espíritu Santo sehe m_usa mehne jira. ¿Tíre masierajari m_usa? ¹⁷ Cohamac_u ya w_uh_u ñaa marieni w_uh_u jira. Ñ jina m_usa c_uh_u tí w_uh_u yoaro sehe jina to yaina warota jira. Ñ jiro to yainare cãiro to dojomehnech_u Cohamac_u pichac_u cap_u cohãnohca tiro sehere.

¹⁸ Mahñoare tãhotuena tjiga m_usa. “Mip_u

macaina ya masiare noano masija”, ni t̄hoturiro m̄sa mehne macariro jiro Jesu ya sehere noano masijaro. To ã masich̄ ñ̄a paina tirore “T̄ho masierariro jira”, niahca. ã jiro Jesu yare masino, potocãta noano masiro waharohca. ¹⁹ Masa ti m̄ s̄ro ti basi ti masiare “Wiho warota jira”, ni t̄hotura Cohamac̄. ãta nina Cohamac̄ yare ti joari p̄i: “Ti m̄ s̄ro masiina ti masia yaba cjihti jierara Cohamac̄ to ñ̄ch̄. ã jiro ti yoa duaare d̄catara tinare”, nina Cohamac̄ yare ti joari p̄i. ²⁰ ã yoa pa p̄p̄ õ sehe nina: “Masa ti m̄ s̄ro masi pahñoina ti t̄hotua yaba cjihti ti jierach̄ masina mari p̄h̄toro Cohamac̄ sehe”, nina Cohamac̄ yare ti joari p̄i. ²¹⁻²² ã jina “Sã m̄ s̄ro yoahi”, ni masieraja mari masa jina. ã jina ȳh̄ Paulo, Apolo, Pedro mehne sã jipihtina Cohamac̄ m̄sare to yoadoho dutiina jina, m̄sare dahra cohtaina jia sã. Jipihtia m̄sa ya jira. Cohamac̄ to bajuamehnerire, catia c̄h̄are ware m̄sare. Tuhs̄, pichacap̄ wahaerach̄ yoarohca m̄sare. Mip̄ jiare baharop̄ jihti c̄h̄are m̄sare warohca. ã jia jipihtia m̄sa ya jira. ²³ ã yoa m̄sa sehe Cristo yaina jira. Cristo sehe Cohamac̄ yairo jira.

4

Cristo to yare buhe duti to c̄rina ti dahraare yahuha Paulo

¹ Õ sehe ni t̄hotuga m̄sa ȳh̄are Apolo c̄h̄are: “Tina sehe Cristore dahra cohtaina jira. ã jia masa ti masierari cjirire Cohamac̄ yare buheina jira”, ni t̄hotuga m̄sa sãre. ² Dahra cohtaina ti p̄h̄toro

to dutiro seheta yoa cohtara. ³ Wiho mejeta yuhure musa yahuwajapachuta ã tũhotunocaja yuhũ. Paina pũhtoa yuhure ti yahuwajachũ cũhure ã tũhotunocaja yuhũ. Yũ yoaare ñũna “Ahri noaa jira. Ahri ñaa jira”, ni masierara musa. Yuhũ cũhũ masũnota jija. ã jicũ yũ yoaare noano masi pahũoeraja yuhũ cũhũ. ⁴ “Cristo yare yũ yũhdũrũcari yuhure mariahna”, ni tũhotumaja yuhũ. Yũ õ sehe ni tũhotupachuta buhiri tia jisini-boca yuhure. Mari pũhtoro Cristo dihta yũ yoaare ñũno, noano masina. ⁵ ã jina mari pũhtoro to tjua tahto pano masare ñãno ni yahuwajaena tjiga musa. Tiro tjua taro masa ti yoarire, panopũ paina ti masierari cjirire Cristo masichũ yoarohca. ã jiro mari yoa duarire, mari tũhotuare tiro masichũ yoarohca. ã yoaro to yare yoainare Cohamacũ “Noano yoare musa”, ninohca.

⁶ Yũ coyea, yuhũ Apolo mehne sã buheri cjirire yahuhi yuhũ musare buhecũ tacũ, sãre musa ñũ cũhto sehe. ã yahuhi yuhũ Cohamacũ to yare ti joari pũi to niriro seheta quihõno musa yoarucũto sehe. ã yoana musa mehne macainare cãno potori ño payoga. Cũiroreta ño payoena tjiga. ⁷ Mũsa sehe paina yũhoro noaina jierara. Masi yũhdũrũcaina jierara musa. Cohamacũ musare to wari cjiri dihtare cjuara musa. ã cjuana musare to yahuri cjiri dihtare masina musa. ¿Mũsa mũ sũro cjuaina, mũsa mũ sũro masiina jierapanahta, dohse yoana “Masi pahũoina jija”, nijari musa? ã nina “Sã mũ sũro masija sã”, niborina seheta yoara musa.

⁸ Mũsa sehe “Cohamacũ yare masi pahũoja

sã. Sãre yaba waro dahsaerara”, nimana m̄sa. Tuhs̄, m̄sa cahai sã jierach̄ m̄sa õ sehe ni t̄hotumana: “P̄h̄toa yoaro sehe masiina jija sã”, ni t̄hotumana m̄sa. Potocãta Cohamac̄re masi pah̄noina p̄h̄toa yoaro sehe masiina m̄sa jich̄ m̄sare noabiaboa. M̄sa ã jich̄ m̄sa mehne sã cãh̄ p̄h̄toa yoaro sehe masiina jiboa.

⁹ Õ sehe ni t̄hotuja ȳh̄ pinihta: Sãre Jesu to yare buhe dutiro c̄no, masape doca macari curua c̄re sãre. Paina ti wajãhtina yoaro sehe ñna masa sãre. Ahri yahpa macaina masa, anjoa cãh̄ wapanañoina yoaro sehe ñna sãre. ¹⁰ Cristo yare sã buhech̄ ñna “T̄ho masieraina jira”, ni ñna masa sãre. ã jia Cristo yare sã yoach̄ ñna, sãre ñ tuhtira. M̄sa sehere ñna, “Noano masiina jira”, ni t̄hotumana masa. “Cohamac̄re wac̄ tuaeraina jira”, ni t̄hotumana masa sãre. M̄sa sehere ñna, “Noano wac̄ tuaina jira”, ni t̄hotumana tina. M̄sa sehere masa ño payora. Sã sehere tina ne ño payoerara. ¹¹ Sã sehe mip̄re ñano ȳhd̄ina, j̄ca baaina, ñahma yapioina, ñano suhti maeraina, w̄h̄se maeraina jija. Tuhs̄, paina sãre ño payoeraa, sãre ñano yoara. ¹² ã yoa sã tuaro dahraja. Tuhs̄, paina sãre ñano ni ti durucupach̄ta sã sehe tinare “Noano jiga”, nija sã. ã yoana paina sãre ñano ti yoapach̄ta ã t̄hotunocaja sã. ¹³ “Ñano yoaina jira”, sãre ti nipach̄ta sã sehe noano mehne tinare yoaja. Panop̄, mip̄ cãh̄re ñaa wete tiina yoaro sehe masape curuari doca macari curua yoaro sehe ñna masa sãre.

¹⁴⁻¹⁵ M̄sare noaa buheare buhe m̄htac̄ m̄sa p̄sc̄ yoaro seheta wahai ȳh̄. Paȳ m̄sare Cristo

yare buheina ti jipach_uta m_usare buhe m_uhtariro c_uirota jija y_uh_u. ã jiriro jic_u m_usare b_uo tich_u yoai tai ahrire joai nieraja y_uh_u. Y_u pohna warore, y_u cah_uinare y_u dutiboriro seheta m_usare noano mehne dutic_u tac_u ahrire joaja y_uh_u. ¹⁶ ã jic_u ahrire m_usare tuaro mehne dutii tai nija y_uh_u. Y_uh_ure ñ_u c_uga m_usa.

¹⁷ Ahrire yoa dutic_u tac_u m_usa cahai Timoteore warocahi. Tiro y_u cah_uiro mari p_uhtoro Jesu yairo jira. ã jiro Cristo yare yoarucura tiro. Cristo yare mari yoahtire jipihtina Jesu yaina cahap_u buhei y_uh_u. Timoteo tíre m_usare wac_urucuch_u yoarohca. ã jic_u Cristo yare y_u yoariro seheta m_usa ñ_u c_uhto sehe Timoteore warocahi y_uh_u. ¹⁸ Timoteore y_u warocach_u c_uina m_usa mehne macaina p_uhtoa ji duaina õ sehe nimana: “Paulo marine cuiro, mari cahap_u tasi”, ni t_uhotumana tina. ¹⁹ Cohamac_u cahmach_u m_usa cahap_u michapucac_uta s_uihca. ã s_uc_u p_uhtoa ji duainare m_usa mehne macainare ti durucua quih_uno jich_u masi- ihtja y_uh_u. ã yoa Cohamac_u tuaare potoc_uta ti cj_uach_u c_uh_ure masi- ihtja y_uh_u. ²⁰ “Cohamac_u s_u p_uhtoro jira”, mari ni yahupach_uta to yare mari yoaerach_u tí mari ã nimari cjiri yaba cjihti jierara. Cohamac_u to tuaa mehne to cahmano sehe yoa masija. Tí pinihta wiho waro jierara. ²¹ ¿M_usa cahap_u m_usare buhiri dahrehtiro m_usare tuhti- htiro y_u wahach_u cahmajari m_usa y_uh_ure? ¿O m_usare cah_uiro m_usare wahchehtiro y_u wahach_u cahmajari m_usa y_uh_ure? ¿Dohse jiriro y_u wahach_u cahmajari m_usa?

5

Corinto macaina ti wñana tirire yahuha Paulo

¹ Potocãta õ sehe quiti tira sãre paina: Cãiro mñsa mehne macariro to pñcuro namonore wñana tiyuhca. Æta ni yahura masa sãre. Paina Cohamacure cahmaeraina jipahta tina sehe tó sehe yoaina jierara. ² Mñsa mehne macariro to ã yoapachuta mñsa sehe “Quihõno yoana nija sã”, ni tãhotumana. ¿Dohse yoana to ñaa yoarire masipanahta cahyaerajari mñsa? Æ jina ã ñano yoarirore mñsa mehne Jesu yaina mehne jirirore cohã wioboa mñsa. ³ Yññ mñsa mehne jierapaihta yñ wacũarñ mñsa mehmeta jija yññ. Æ jicñ mñsa mehne jicñ yñ niboriro seheta ñano yoarirore to ã ñano yoari buhiri buhiri dahre duti tuhsuja yññ. ⁴ Jesu to dutiro mehmeta ã yoa dutija. Æ jina mñsa cahmachuna yñ wacũa mehnerñ mñsa mehne yñ jichñ to pñcuro namono mehne ñano yoarirore cohã wiona, mari pñhtoro Jesu to tuaa mehne õ sehe niga ñano yoarirore: ⁵ “Watĩno to cahmano seheta mññre yoawahnojarõ”, niga tirore. Æta niga tirore ñaare to goa pjari cjirire to duhuhto sehe. Mñsa ã cohãchñ tiro ñano yñhdñrohca. Mari pñhtoro Jesu to tjua tari dachoi ñano yoarirore cjiro Jesu mehne to noano yñhdñhto sehe mipñre tirore ã niga.

⁶ “Quihõno yoana nija sã”, nipanahta ñano yoana nica mñsa. Ñano yoarirore mñsa ã ññnocahna, tí ñaare mñsa jipihtina piha pihtia wahanahca. Pão bñcuro trigore to noano sãarñcñ sñriro seheta tí ñaa mñsare piha, noano sãarñcñ

sua waharohca. ¿Tíre masierajari m̄usa? ⁷ Ȳu coyea judio masa pascua jich̄u ovejare wajã, j̄u m̄uo, Cohamac̄ure ño payora. Tó seheta oveja to yariariro seheta Cristo mari ñaa buhirire yariari jire. To ã waharire masina, m̄usa sehe ñano yoarirore m̄usa mehne macarirore cohã wioga tí ñaa m̄usare to pihaerahto sehe. M̄usa ñaa yoari buhirire cohã tuhs̄ure Cristo. ã jina ñano yoarirore cohã wioga “Tí ñaare pihari”, nina. ⁸ Pão b̄uc̄uaro trigore to s̄aar̄uc̄u s̄ur̄iro seheta panop̄u ñaare ñ̄u c̄ũ yoa pihtiina jimai mari. ã jina pascua bose n̄am̄urihi pão b̄uc̄uaro marieno pãore ti ch̄ur̄iro seheta mari c̄ũh̄u ñaare goa p̄jaro marieno ñano yoaro marieno jijihna. Panop̄u mari ñaare mari yoaa tiriro sehe yoaena tjijihna. ã yoana potocã noano t̄uh̄otua mehne, noano yoaina jijihna.

⁹ M̄usare ȳu joarocari p̄ũp̄ure Jesu yairo jiparota ã w̄hana tirucurirore ne piti ti dutieramahi. ¹⁰ ã nic̄u numia mehne ñano yoainare, m̄ua mehne ñano yoaa numiare, paina yare goa p̄jainare, yacainare, “Cohamac̄u jira”, ti nia mas̄urine ño payoinare Jesu yaina ti jierach̄u “Tina mehne jiena tjiga”, nieraja. Ahri yahpai tó sehe jina marieno Jesure cahmaeraina marieno mari dihta ji masieraja. Jipihtirop̄u jira tina sehe. ¹¹ ã jic̄u m̄usare joarocac̄u õ sehe yoa dutimahi: M̄usa mehne macariro “Jesu yairo”, ti niriro to jipach̄uta numino mehne ñano yoariro, paye barore goa p̄jariro, “Cohamac̄u jira”, ti nia mas̄urine ño payoriro, ñano q̄uti dahrerucuriro, cahariro, yacariro to jich̄u tirore piti tiena tjiga. ã jina

tó sehe yoariro mehne pinihtare chüena tjiga. ¹² Jesu yaina jierainare ti ñaa yoari buhirire ne buhiri dahre dutiriro jieraja yuhü. Tó sehe buhiri dahre dutiriro jira Cohamacü sehe. Yü ã nipachüta müsa mehne cahmachuina Jesu yaina müsa basi müsa yoarire ñüna masino cahmana müsa sehere. Ñ tühotunocaeraro cahmana. Ñ jina müsa sehe tina ti ñano yoachü ñüna buhiri dahrega tinare. ¹³ Jesu yaina jieraina sehere Cohamacü sehe buhiri dahrerohca. Ñ jina müsa sehe müsa mehne macarirore ñano yoarirore cohã wioga.

6

Jesu yainare ti basi ti yahusaãrire yahuha Paulo

¹ ¿Müsa basi cahma ñü tuhti yahusã duana dohse jiro baro Jesu yaina jieraina cahapü müsa coyeare Jesu yainare yahusãna wahajari? Jesu yainare müsa mehne macainare yahusã duana paina Jesu yaina sehere tíre yahuro cahmana müsare. Ñ jia Jesu yainapü besejaro. ² Pihtiri dacho jichü mari Jesu yaina sehe masa jipihtina ti yoarire ñüna “Ahri ñaa jira. Ahri noaa jira”, besenahca mari tinare. ¿Tíre masierajari müsa? Ñ jina pihtiri dacho jichü masa jipihtinare be-sehtina jina, mipü cühüre bese masija mari. Ñ jina mipüre wiho jiacã buhiri cühüre bese masija mari. ³ Anjoa ti yoarire ñüna tina cühüre besenahca mari. ¿Tíre masierajari müsa? Mari ã besehtina jina potocãta tí yühodoro mipü cühüre Jesu yaina ti yoarire ñüna bese masija mari. ⁴ ¿Ñ jina dohse yoana müsa mehne macainare yahusã duana mari mehne jieraina cahapü Jesu

yainare yahusãna wahajari m̄sa? ⁵ Ahrire nii nija m̄sa quihõno yoerarire m̄sa cahyahto cjihtore. ¿M̄sa mehne macainare m̄sa cahma sayoch̄ m̄sare yahuhtiro m̄sa mehne macariro noano masiro mariajari? Jira. ⁶ To ã jipach̄ta m̄sa mehne macariro Jesu yairo paio Jesu yaiore yahusã duaro Jesure cahmaerainare yahusãno wahara.

⁷ Masare beseina p̄htoare m̄sa mehne macainare yahusãna Jesu yaina jipanahta quihõno yoerara m̄sa. Pairo m̄sa mehne macariro m̄sare ñano to yoach̄ ã ñnocaboa m̄sa. Jesure cahmaerainare m̄sa yahusãhto pano m̄sa coyeiore m̄sa ã ñnocach̄ noabiaboa. Jesu yairo m̄sare to yacach̄ tirore m̄sa yahusãhto pano tiro to yacarire m̄sa ã ñnocach̄ noabiaboa. ⁸ ã yoaborina jipanahta paina m̄sa mehne macaina Jesu yaina ti jipach̄ta tinare ñano yoaina, yacaina jira m̄sa.

⁹⁻¹⁰ Tó sehe yoaina p̄htoro Cohamac̄ to s̄ho jiropr̄e m̄anopr̄e waha masierara. ¿Tíre masierajari m̄sa? Mahñoare tuhutuena tjiga m̄sa: W̄ana tiina, “Cohamac̄ jira”, ti nia masirine ño payoina, numia mehne ñano yoaina, m̄a mehne ñano yoaa numia, m̄a sahsero ti p̄jacr̄i mehne ñano yoaina, numia sahsero ti p̄jacr̄i mehne ñano yoaa numia, yacaina, paina yare goa p̄jaina, cahaina, masare ñano tuhtipeina, masa ti c̄j̄aare maina baro ne P̄htoro Cohamac̄ to s̄ho jiropr̄e m̄anopr̄e waha masierara.

¹¹ Panopr̄e m̄sa c̄h̄ tó sehe yoaina tjimahre. ã yoamarina m̄sa jipach̄ta mip̄re m̄sa ñano yoari buhirire cosa tuhs̄ri jire Jesucristo sehe.

Ã to cosarina m̄sa jich̄u to yaina cjihtire yoare Cohamac̄u m̄sare. Ã yoaro “Noaina jira”, ni ñ̄na m̄sare tiro. Ãta yoare m̄sare mari p̄htoro Jesucristo, Esp̄ritu Santo c̄h̄u ti tuaa mehne.

Mari p̄jac̄uri Cristo ya p̄jac̄uri jia nina

¹² “Ȳu cahmano sehe yoa masija ȳh̄u”, niyuhca c̄ina m̄sa. Tí potoc̄a to jipach̄ata tíre yoac̄u noano jieraboca ȳh̄u. Ȳu cahmano sehe yoa masija. Ã yoa masipaihta c̄a tahari ã yoariro jic̄u tíre duhu masieraboca ȳh̄u. Ã jic̄u tíre pari turi yoasi ȳh̄u, “Tíre duhu masieraboca”, nic̄u. ¹³ Õ sehe nina m̄sa: “Jipihtia ch̄ua mari p̄jaro macaa cjihti jira. Tuhs̄u mari p̄jaro ch̄ua posa tihti p̄jaro jira”, nina m̄sa. Tí potoc̄a tjira. Ã jiparota baharo Cohamac̄u sehe mari ch̄uare mari p̄jaro c̄h̄ure ti pihtia wahach̄u yoarohca. Ã jia mari ch̄ua wiho warota jia nina. Ch̄ua mari p̄jaro macaa cjihti jira. Ã jiparota mari p̄jac̄uri numino mehne ñ̄ano yoahti p̄jac̄uri jierara. Mari p̄jac̄uri sehe mari p̄htoro Cristo ya p̄jac̄uri cjihti jia nina. Ã jiro mari p̄htoro sehe mari p̄jac̄urire noano yoahtiro cjihto jira. ¹⁴ Cohamac̄u to tuaa mehne mari p̄htoro Cristore masori jire. Ã to yoariro seheta mari c̄h̄ure masonohca tiro.

¹⁵ ¿Ã jina m̄sa p̄jac̄uri Cristo ya p̄jac̄uri ti jich̄u masierajari m̄sa? ¿Ti ã jich̄u Cristo ya p̄jac̄u mehne ñ̄ano yoaricoro mehne mari ñ̄ano yoach̄u noajari, m̄sa t̄hotuch̄u? Noaerara. ¹⁶ Ñ̄ano yoaricorore ñ̄ahariro to p̄jac̄u sehe ticoro ya p̄jac̄u mehne jiro, c̄u p̄jac̄u yoaro seheta jira. ¿Tíre masierajari m̄sa? Ãta ni joaa tiri jire Cohamac̄u

yare ti joari tjui: “Tina p̄aro jipahta c̄ p̄ac̄u yoaro sehe wahara”, ni joaa tiri jire. ¹⁷ Mari p̄ah̄toro to yaina mehne jira. ã jiro Jesu yairo Jesu mehne p̄aro jipahta c̄no potori tahotuina c̄airota ti jiboro seheta jira.

¹⁸ ã jina numia mehne ñano yoaare, m̄ua mehne ñano yoaare goa p̄aena tjiga. Tíre m̄usa yabiro seheta tíre yoaena tjiga. Paye ñaare mari yoana mari p̄ac̄ure dojomehneraja. Numino mehne ñano yoariro sehe to p̄ac̄ure ñano dojomehnena.

¹⁹ Espíritu Santore marine ware Cohamac̄u. ã jiro mari mehne jiro nina Espíritu Santo sehe. ¿Tíre masierajari m̄usa? ã jia m̄usa p̄ac̄uri m̄usa catia c̄h̄u m̄usa ya c̄ihti waro jierara. Cohamac̄u yaina c̄ihti waro jira m̄usa. ²⁰ M̄usa ñaa buhirire buhiri dahre tuhs̄ure Cristore. ã jina to yaina c̄ihti waro jira m̄usa. To yaina jina m̄usa p̄ac̄uri mehne Cohamac̄u to cahmano sehe yoaga. ã yoana Cohamac̄ure ño payona nina m̄usa.

7

Namo tiare yahuha Paulo

¹ Mip̄ure ȳh̄ure m̄usa sinitu m̄usa joarocari c̄jirire ȳh̄u c̄h̄u ȳhti cahmai tai nija: Mas̄no namo tierach̄u c̄h̄ure, noanocahna, ȳu tahotuch̄u.

² Tí ã jipach̄ata m̄ua sehe namo tijaro paina numia mehne ti ñano yoaerahto sehe. ã jia numia c̄h̄u man̄u tijaro paina m̄ua mehne ti ñano yoaerahto sehe. ³⁻⁴ Man̄u tiricoro to p̄ac̄u to ya p̄ac̄u dihta jierara. To man̄no ya p̄ac̄u c̄h̄u jira. To man̄no c̄h̄u to p̄ac̄u to ya p̄ac̄u dihta jierara. To namono

ya pꝓacꝓ cãhꝓ jira. ã jina mꝓsa mꝓa sehe mꝓsa namosãnumiare noano cꝓaga. ã yoa mꝓsa numia cãhꝓ mꝓsa manꝓsumare “Yꝓ pꝓacꝓre pihaecꝓ tjiga”, niena tjiga. ⁵ Wiho mejeta Cohamacꝓre pꝓaro mꝓsa sini duana “Mahaa dachoricã mari basi jiena tjijihna. Cohamacꝓre sinijihna”, cãno potori ã nina, mꝓsa basi wahã duhu masina mꝓsa. Mꝓsa ã duhuri baharo mꝓsa jiro sehetã jirucuga tjoa, Satana ñano mꝓsare to yoa dutierahto sehe. “Paina mehne ñano yoaboca” nina, mꝓsa basi piti ti duhuena tjiga. Mꝓsa jiro sehetã jirucuga tjoa.

⁶ Ahrire mꝓsare mipꝓ yꝓ niri cꝓire yahucꝓ mꝓsare dutia waro mehne nieraja. ã yahuta nija mꝓsa yoahore mꝓsa masihto sehe. ⁷ Jipihtina mꝓsa yꝓ yoaro sehetã namo tieraina mꝓsa jichꝓ noaboa yãhꝓre. ã ji duapanahta mari jipihtina cãno potori jieraja. Cãinare marine namo ti dutira Cohamacꝓ. Cãinare namo ti dutierara.

⁸ ã yoa namo marieinare, manꝓ marieinare, wapewahya cãhꝓre õ sehe nija: Namõ marieina, manꝓ marieina ji masina, ãta jinocahga mꝓsa yꝓ yoaro sehetã. ⁹ ã ji masierana tuaro ñaare goa pꝓana, potota namo tiga. ã yoa numia cãhꝓ manꝓ tiga. Ñaare mꝓsa goa pꝓachꝓ noaeraputiara mꝓsare. Mꝓsa ã goa pꝓana mꝓsa namo tichꝓ pinihta noa nina. ã yoa mꝓsa manꝓ tichꝓ cãhꝓre noana.

¹⁰ Mꝓsa namo tiinare, manꝓ tia numiare õ sehe dutija. Yꝓ ã nipachꝓta ya dutia waro jierara ahri. Mari pꝓhoro Cristo ahrire dutira: Mꝓsa numia sehe mꝓsa manꝓsumare cohãena tjiga. ¹¹ Mꝓsa manꝓsumare cohãna, manꝓ mariea numia sehe

tjuaga. ã tjuerana pari turi tjoa m̄sa man̄suma mehne noano jiga tjoa. ã yoa m̄sa c̄h̄ m̄a m̄sa namos̄numiare coh̄ena tjiga.

¹² ã yoa m̄sa c̄h̄ure painare õ sehe nija ȳh̄. Mari p̄htoro to dutia jierara ahri. Ȳh̄ sehe õ sehe nija m̄sare: C̄ina m̄sa mehne macaina Jesu yaina sehe Jesure cahmaeraa numiare namo tiina jira. ã jina m̄sa namos̄numia m̄sa mehne ti tjua duach̄ tí numiare coh̄ena tjiga m̄sa. ¹³ ã yoa c̄ina m̄sa mehne macaa numia Jesu yaina numia Jesure cahmaerainare man̄ tia numia jira. ã jina m̄sa man̄suma m̄sa mehne ti tjua duach̄ tinare coh̄ena tjiga. ¹⁴ M̄sa man̄suma Jesure cahmaeraina jipahta Jesu yaina numiare ti namo tich̄, Cohamac̄ noaina yoaro sehe ñ̄na tinare. ã yoa m̄sa m̄a sehe Jesu yaina m̄sa jich̄ m̄sa namos̄numia Jesure cahmaera numia jiboca. Ti ã jipach̄ta m̄sa mehne tí numia man̄ tich̄ Cohamac̄ noaa numia yoaro sehe ñ̄na tí numia c̄h̄ure. To ã ñ̄erach̄ m̄sa pohna Jesure cahmaeraina pohna yoaro sehe ñ̄boa Cohamac̄. Wiho mejeta ti pohna c̄h̄ure noaina yoaro sehe ñ̄na Cohamac̄. ¹⁵ ã yoa m̄sa m̄a sehere m̄sa namos̄numia Jesure cahmaeraa numia m̄sare coh̄ duaa, ãta yoajaro. M̄sa man̄suma c̄h̄ ã coh̄ duaa, ãta yoajaro. Noano mari jich̄ cahmana Cohamac̄. ã jiro tí numia m̄sare ti coh̄ duach̄ “Tí numia mehne jisniga”, ni dutierara Cohamac̄. ¹⁶ Ti namos̄numia Jesu yaina numia sehe noano ti yoach̄ ñ̄a baharop̄ ti man̄suma sehe Jesure cahmaboca. ã ti cahmach̄ Cohamac̄ tinare pichac̄p̄ wahaborinare ȳhd̄ch̄ yoaro-

hca. ã yoa ti manꝯꝯma Jesu yaina sehe noano ti yoachꝯ ñna baharopꝯ ti namosãnumia Jesure cahmaboça. Ti ã cahmachꝯ Cohamacꝯ tí numiare pichacapꝯ wahabori numiare yꝯhdꝯchꝯ yoarohca. ã Jesure cahmaborina ti jipachꝯta potota Jesure ti cahmahtore masiyuhto basioerara mꝯsare.

17 ã jina jipihtina mꝯsa mari pꝯhtoro Cristo mꝯsare to ji dutiriro seheta yoaga. ã yoana Cohamacꝯ mꝯsare to cūri cjirire yoaga mꝯsa. Tíre jipihhtina Jesu yainare ã yoa dutirucuja yꝯhꝯ. 18 Jesu yaina mꝯsa jihto pano circuncisiõre yoarina cjiri jina, ãta jirucuga. Tuhsꝯ, Jesu yaina mꝯsa jihto pano circuncisiõre yoaeraina cjiri jina mipꝯ cūhꝯre ãta jirucuga. 19 Mipꝯre circuncisiõre yoarina mꝯsa jichꝯ yaba cjihti jierara. Tíre yoaeraina mꝯsa jichꝯ cūhꝯre yaba cjihti jierara. Wiho mejeta Cohamacꝯ dutiare mari yoachꝯ tí pini wiho waro jierara. 20 ã yoana Cohamacꝯ Jesu yaina mꝯsare to cūri pja mꝯsa jiriro seheta tjuaga. 21 Jesu yairo mꝯ ji dꝯcahto pano masꝯnore dahra cohtariro mꝯ jichꝯ noanohca. ãta tjuasiniga. Mꝯ pꝯhtoro mꝯhꝯre to wio duachꝯ sehere wijaga mꝯhꝯ. Mꝯ wijachꝯ noanohca mꝯhꝯre. 22 Mari pꝯhtoro Jesu yairo cūiro jiro masꝯnore dahra cohtariro jiparota Jesu to yꝯhdꝯchꝯ yoariro jira. ãta pairo mari pꝯhtoro Jesu yairo jiro, masꝯnore dahra cohtariro jieraparota Jesure dahra cohtariro jira tiro cūhꝯ. 23 Mari ñaa buhirire buhiri ti tuhsꝯri jire Cristo. ã jina tiro dihtare “Yꝯ pꝯhtoro waro jira”, ni tꝯhotuga mꝯsa. Paina mꝯsare tíre ti ã ni tꝯhotu dutierachꝯ tinare tꝯhoena tjiga. 24 ã jina yꝯ coyea,

Jesu yaina cjihti Cohamacu musare to cūri pja musa jiriro seheta tjuaga. ã tjuana Cohamacu mehne macaina jiga.

²⁵ Mipure namo marieinare, manu maria numia cūhure yahu duaja musare. Mari puhtoro ahrire “Õ sehe niga”, nierare yuhure. Yuhure to pja ñuchu yuhure to yoadohochu to cahmano seheta yoarucuriro jija yuhu. ã jiriro jicu ahrire noano yahuihtja musare. ²⁶ Mipure musa ñano yuhduna nica. ã jiromahchu musa namo marieina cūhu manu maria numia cūhu musa tjuachu noanohca, yu tuhochu. ²⁷ Namu tiina, manu tia numia musa jina āta tjuaga. ã yoa namo marieina, manu maria numia musa jina āta tjuaga. ²⁸ Namu tina ñano yoaerara musa. ã yoa musa nuhmia manu tina ñano yoaerara musa cūhu. Wiho mejeta namo tiina, manu tia numia musare waruro tjuarohca ahri yahpahi masa ti ñano yuhduro seheta musa ñano yuhduchu. ã jicu musare “ã waru tiri” nicu, “Namu marieina, manu maria numia tjuaga”, nihi yuhu.

²⁹ Yu coyea, ahrire musare yahui nija. Cristo ahri yahparu to tjua tahto mahanocā duhsara. ã jia mipure namo marieina Cohamacu to cahmano sehe ti noano yoa masino seheta noano yoaro cahmana namo tiina cūhure. ã yoa manu tia numia cūhure āta Cohamacu to cahmano sehe noano yoaro cahmana. ³⁰⁻³¹ Ahri yahpa to mipu jiro seheta baharocāta pihtia waharohca. ã pihtihti yahpa to jichu mipure mari ñahacaha tiia, mari wahchea, mari cjuaa pihtia wahaahca. ã jia tí

wiho waro jira. Cohamacu yare yoaa sehe wiho waro jierara. Ñ jia ahri yahpa macaare cjuaina, cjueraina yoaro sehe jijaro. Ahri yahpa macaare pjíro t̄hotuea t̄jijaro. Ahri yahpa to mipu jiro seheta baharoc̄ata pihtia waharohca.

³² M̄sa ñano ȳhd̄erach̄u cahmaja ȳh̄u. Pj́ro m̄sa t̄hotuerach̄u c̄h̄ure cahmaja. Namō marieriro Jesu yairo jiro Jesu yare wac̄urucura. Ñ wac̄urucuro Jesu cahmaare tuaro yoa duara.

³³ Namō tiriro sehe to namono cahmaa sehere tuaro yoa duara. Ñ jiro ahri yahpa macaare pj́ro t̄hotura. ³⁴ Ñ jiro tiro p̄aro macaare yoa duara. Jesu cahmaa c̄h̄ure, to namono cahmaa c̄h̄ure tiro yoa duara. Ñ yoa b̄coro man̄u marienicoro jiro, ticoro mari p̄htoro Jesu cahmaare tuaro yoa duara. Nuhmino c̄h̄u ãta yoa duara. Ñ yoa duaro to pjac̄u mehne, to wac̄u mehne c̄h̄ure ticoro tuaro Cohamacu yacoro ji duara. Man̄u tiricoro sehe ahri yahpa macaa sehere to man̄no cahmaa sehere tuaro yoa duara. Ñ jiro ahri yahpa macaare pj́ro t̄hotura.

³⁵ Ahrire m̄sare nii nija m̄sare yoadohocu tac̄u. War̄oa dutiare m̄sare c̄u duaeraja. Ñ c̄u duaerap̄ihta noano m̄sa yoach̄u cahmaja. Jesu mari p̄htoro yare m̄sa tuaro yoa duach̄u cahmaja ȳh̄u.

³⁶ M̄sa mehne macariro to s̄h̄aduricoro to b̄coro curero to wahach̄u ñ̄no namō tijaro tiro ticorore. “Ñta yoaro cahmana ticorore”, ni t̄hoturo to niriro seheta yoajaro tiro ticorore. Ticorore namō ti masina. Ñ yoaro tiro ñ̄no yoaerara. ³⁷ Pairo sehe to s̄h̄aduricorore

namo ti duaeraro, to cahmano seheta yoajaro tiro ticorore. “Ticorore namo tieraja yũhũ”, ni tũhoturo to cahmano seheta yoa duaro, tó seheta yoajaro. Ñ yoariro noano yoara. ³⁸ Ñ yoa to sũhũduricorore namo tiriro cãhũ noano yoara. Tuhsũ, to sũhũduricorore mipũre namo tierariro sehe paio yũhũdoro noano yoaro nina.

³⁹ Manũ tiricorore to manũnore cohã dutierara Cohamacũ. To ã cohã dutierapachũta to manũno to yariari baharo ticoro paio mehne to cahmariro mehne manũ ti masina. Ticoro to manũ tirirore Jesu yairo jiro cahmana tirore.

⁴⁰ Ticoro manũ marienicoro tjuaro, manũ tiricoro yũhũdoro noano wahchericoro jirohca ticoro. Ñta ni tũhotuja yũhũ sehe. Cohamacũ to Espĩritu Santore cjũariro jija. (Yũ ã jiriro jichũ masina ahri yũ yahurire masiga mũsa.)

8

“Cohamacũ jira”, ti nia masũrine ño payo ti duhu payoa chũare yahuha Paulo

¹ Mipũre “Cohamacũ jira”, ti nia masũrine ño payo ti duhu payoa chũare yahu duaja. Jipihtina mũsa tí barore “Masija”, ni tũhotura mũsa. Ñ ni tũhotuna “Painare masi yũhdũrucaja”, ni tũhotumana cãina. Ñ ni tũhotua painare yoadoherara tina. Painare cahĩa tinare yoadohora. Ñ yoa masia yũhũdoro painare cahĩa sehe wiho waro jierara. ² “Masi pahñonocaja”, ti mũ sũro niina jia, Cohamacũ noare to masi dutiare masierasinica tina. ³ Wiho mejeta Cohamacũre ti cahĩchũ tinare masina tiro. (Ñ jia to yaina jira tina.)

4 Ñ yoa “Cohamacu jira”, ti nia masurine ño payo ti duhu payoa chũare ahrireta yahuihtja: Tí masuri ne yaba cjihti jierara. Potocãta tí masuri yajeripohna mariahna. Cohamacu sehe cãirota jira. Paina cohamana mariahna. Ahrire mari masija. 5-6 “Payu cohamana jira. Tina mari puhtoa jira”, ni tũhotumana masa. Ñ yoa mũanopu, ahri yahpapu cũhure “Cohamana”, ti niina jipachuta mari sehere cãirota jira Cohamacu. Tiro mari Pucu jipihtiare bajuamehneriro jira. Ñ yoaro to yaina cjihti yoari jire tiro marine. Ñ jiro mari puhtoro Jesucristo cãirota jira. Tiro jipihtiare mari Pucure yoabasariro jira. To yaina cjihtire yoari jire tiro marine. Ñ jina tiro mehne ã jirucunahca mari.

7 Yu niriro sehe ã jipachuta paina Jesu yaina tíre masierara. Panopu tina “Cohamacu jira”, ti nia masurine “Catiina jira”, ni tũhoturucumaha. Tí pjarure ã yoarina jia mipu cũhure tí masurine ño payo ti duhu payoa chũare “Cohamana ya chũa jira”, ni tũhotumana. Ñ yoaa tí chũare chũa, “Mari ñano yoana nija cohamana ya chũare chũna”, ni tũhotumana. Tíre ti yoarire noano masieraa, ã ni tũhotumana. Ñ jia tina ñano yoaa nina, ti tũhotuchũ. 8 Tí chũare mari chũchũ mari chũerachũ cũhure Cohamacu marine “Noaina jira”, ni ñuerara. Ñ yoa tí chũare mari chũchũ wiho warota jinocahno nina tí chũa. Mari tíre chũna ñano yoeraja. Tí chũare mari chũerachũ cũhure wiho warota jinocahno nina. Tí duhu payoa chũare mari chũerana paina yũdoro noaina jieraja mari cũhũ. 9-10 Wiho mejeta noano yoaga mũsa. Tí chũare chũrina cjiri mũsa jichũ paina

m̄sare, “Masija” niinare, ñ̄ cū ch̄boca. ã ñ̄ cū ch̄a ti yoare noano masieraa, “Ñano yoana nija mari”, ni t̄hotuahca tina c̄h̄. Ti ã ni t̄hotuch̄ tina sehere ñano yoach̄ yoana nica m̄sa. ã jina noano yoaga m̄sa. ¹¹ “Mari tí ch̄are mari ch̄ch̄ noanohca marine”, m̄sa ni t̄hotuina jina paina noano masieraina cjirire ñano yoach̄ yoaboca m̄sa, m̄sare ti ñ̄ cūch̄. Tina ya cjihti c̄h̄are yariari jire Cristo. ã yoana Cristo yainare m̄sa coyeare ñano yoach̄ yoana niboca m̄sa. ¹² Noano masierainare Cristo yainare m̄sa ñano yoach̄ yoana, Cristo c̄h̄are ñano yoana nica m̄sa. ¹³ ã jic̄ tí mas̄rine ño payo ti duhu payoa ch̄are ȳh̄ ch̄c̄ Cristo yainare ñano yoach̄ yoai niboca ȳh̄. Cristo yaina ti ñano yoach̄ cahmaeraja. ã jic̄ “Ȳh̄ tinare ñano yoach̄ yoari” nic̄, tí ch̄are ne pari turi ch̄si ȳh̄.

9

Paulo Jesu to c̄riro to jia tiare yahuha

¹ Jesu to yare buhe dutiro to c̄riro jija. ã jic̄ paina to c̄rina ti yoaro seheta yoa masija ȳh̄ c̄h̄. Mari p̄h̄toro Jesure ñ̄riro tjija ȳh̄ c̄h̄. ã jina Jesu yare ȳ buhech̄ m̄sa sehe tíre noano t̄horina jina to yaina wahare m̄sa. ã to yaina waharina jina Jesu to c̄riro ȳ jich̄ masi tuhs̄ra m̄sa. ² Paina ȳh̄are yahuwajaa “Tiro Jesu to c̄riro jierara”, niboca. Ti ã nipach̄ta m̄sare ȳ buheri baharo Jesu yaina wahana, “Jesu to c̄riro jira” ni, ȳh̄are masi tuhs̄ra m̄sa. ã jina paina ti

yahuwajapachuta m̄sa sehe to c̄ūriro ȳu jia tiare masina.

³ Ȳuh̄ure yahuwajainare ò sehet̄a ni ȳuht̄iht̄ja:

⁴ M̄sare ȳu buheri baharo ȳu ch̄uht̄ire ȳu sihniht̄i c̄uh̄ure ȳuh̄ure waboa m̄sa ȳu buheri wapa. ⁵ ã jic̄u namo tiriro jic̄u ȳu namo Jesu yacoro to jich̄u

ticoro mehne tini masiboa ȳuh̄u. Paina Jesu to c̄ūrina, Jesu bahana, Pedro c̄uh̄u ti namos̄an̄umia mehne ti tiniriro sehet̄a ȳuh̄u c̄uh̄u tini masiboa.

⁶ Ȳuh̄u Bernabé mehne m̄sare noaa buheare s̄a buhepachuta s̄are ne paye baroc̄a waerare m̄sa.

ã jina s̄a basita s̄a ch̄uht̄i c̄j̄iht̄ire dahra wapatai s̄a.

¿s̄a diht̄are wapataro marieno buhero cahmajari, m̄sa t̄uh̄otuch̄u?

⁷ Ahrina ȳu yahuht̄ina sehe ti dahrari wapa wapatar̄a. C̄ūiro surara to dahrach̄u

to p̄uht̄oa tirore wapara. To basi wapaerara. Ch̄uare toar̄iro c̄uh̄u to toari dicha tich̄u t̄ireta ch̄u

masina. ã yoa ovejare ñ̄u wihboriro to nuina p̄ech̄ore sihni masina tiro. ⁸ “Ti dahrari wapare

waparo cahamana”, nic̄u masa ti dutia diht̄are m̄sare yahueraja. Cohamac̄u to dutiap̄u to niri

c̄jiri c̄uh̄ure m̄sare yahui nija. ⁹ Moise c̄j̄irore to c̄ūri dutiare to yare ti joari p̄ūi ò sehe ni yahura:

“Wach̄u trigo yaparire to dahpori mehne suht̄iwerirore to ch̄u duach̄u to d̄userore d̄uc̄ataena t̄j̄iga”, nia tiri jire Cohamac̄u dutia. ¹⁰ ã dutiro

wach̄uare nino nierari jire. ã dutiro marine nino niri jire marine buhero taro. Wesere sahariro

c̄uh̄u tí dichare narina c̄uh̄u ti dahrari baharo dicha tiri p̄ja jich̄u ti wapataht̄ore cohtara tina. (ã jina dahrainare ti dahrari wapare waro cahmana

marine.)

¹¹ M̄sare Cohamac̄u yare noaa buheare buhei

sã. ¿Sã ã buhech_u m_usa sehe sãre ch_uare waeraro cahmajari, m_usa t_uhotuch_u? Waro cahmana. M_usa wach_u noaboa sãre. ¹² ã waerarina jipanahta paina ch_uare m_usare ti sinich_u m_usa tina sehere wara. Tina m_usare ti ch_uare sinich_u sã sehe tina y_uhdoro m_usare ch_uare siniborina jimaja.

ã wa dutiborina jipanahta sã sehe “Sãre waga”, ne nierahi. “Cristo ya buheare m_usap_u cahmaeraboca” nina, sãre ch_ua mariapach_uta m_usare ne sinierahi. ¹³ Cohamac_u w_uh_ui dahraina tí w_uh_uihta ti ch_uare nana. ã yoa Cohamac_ure ti ño payori mesai cohtaina wahiquirore ti j_urirore mahanocã na ch_ura tina cãh_u. ¿Tíre masierari m_usa? ¹⁴ Tó seheta ti yoariro seheta noaa buheare buheinare ti buheri wapare ti ch_uhtire tinare waro cahmana m_usare. ãta yoa dutire mari p_uhtoro Jesu. ¹⁵ ã jic_u m_usare siniboriro jipaihta y_uh_u ne paye barore sinierahi m_usare. ã jic_u ahrire m_up_ure joac_u paye barore wapa cahmai tai joai nieraja. M_usare ne wapa cahma duaeraja. Yariahtiro jipaihta ne wapa cahmasi y_uh_u m_usare. Wapa marieno buhec_u ji coa y_uhd_uaja. ã jic_u m_usare y_u buheri wapa ne wapata ch_usi.

¹⁶ Noaa buheare buhe dutiro y_uh_ure c_ure Cohamac_u. Tíre buheri mas_uno jinocaihta nija y_uh_u. Noaa buheare buherac_u p_ujac_uoriro jiboa y_uh_u. ã jic_u tí buheare buhec_u “Painare masi y_uhd_ug_ucaja”, niboriro jieraja y_uh_u. ¹⁷ Noaa buheare y_u m_u s_uro buhec_u y_u buheri wapa wapa naboaja y_uh_u. Cohamac_u y_uh_ure to yare buhe dutiro c_ure y_uh_ure. ã jic_u y_u m_u s_uro buheraja.

18 ¿To yare ã buhecũ yaba barore wapatajari yũhũ? Õ sehe jira yũ wapataa: Noaa buheare buhecũ m̄sare ne paye barore sinieracũ wapa marieno tí buheare buheja m̄sare. Yũ ã nirire masicũ wahcheja. Yũ wahcheata jira yũ wapataa.

19 Ne masare dahra cohtariro jierapaihta jipihtinare dahra cohtariro yoaro sehe jija yũhũ payũ paina masa Jesu yaina ti wahahto sehe. 20 ã jicũ yũ coyea judio masa mehne jicũ, ti yoaro seheta yoaja yũhũ Jesu yaina ti wahahto sehe. Cohamacũ to dutia cjirire Moise cjirire to cũri cjirire ño payoriro jierapaihta, tí dutia dihtare ño payoina mehne jicũ tí dutiare ño payoriro baro yoaro seheta jija yũhũ. ãta yoaja yũhũ tina Jesu yaina ti wahahto sehe. 21 ã jicũ Cristo yairo jicũ Cohamacũ dutiare Moise cjirire to cũri cjirire yũhdũrũca duaeraja. Tí dutiare yũhdũrũca duaerapaihta tí dutia marieina mehne jicũ tí dutia marieriro yoaro seheta jija. ãta yoaja yũhũ tina cũhũ Jesu yaina ti wahahto sehe. 22 Jesure noano masieraina mehne jicũ ti yoaro seheta jija. “Masi pahñoriro jija”, nieraja yũhũ. ãta yoaja yũhũ tina cũhũ Jesu yaina ti wahahto sehe. ã jicũ jipihtina masa ti jiriro seheta jija yũhũ cãina tina Jesu yaina to yũhdũchũ yoaina ti wahahto sehe. 23 Ahrire yoaja noaa buheare jipihtina ti tũhohto cjihtore. Yũ ã yoachũ ñũno Jesu to buheriro seheta tiro yũhũ cũhũre noano yoara. (ã jicũ masa ti jia tiro seheta jija.)

24 Õ seheta jira mari piti dahre buhechũ. M̄rocãpeina m̄rocaa tina jipihtina m̄rocara. Tí ã m̄roca pihtipachũta m̄roca yũhdũrũcariro

sꞥ mꞥhtana. ã sꞥ mꞥhtariro wapatarã. ã jina ti mꞥrocariro seheta mꞥsa cꞥhꞥ Cohamacꞥ cahmaare yoaga mꞥsa wapatahto sehe. ²⁵ Jipihina mꞥrocaina ti pꞥacꞥre dojomehneare duhunoca noano mꞥrocapora ti mꞥroca tuahto sehe. Tuhsꞥ, ti noano mꞥrocahto cꞥihtore quihõno chꞥã, quihõno carã, noano yoara tina. ãta yoara tina mꞥroca sꞥ, ti wapatahto sehe. ã jia ti ã yoã wapataã pꞥuri mehne ti yoari soro jira. Tí soro ñaco baaerara. Mari sehe Cohamacꞥ yare noano buheja to yare mari wapatahto sehe. Tí wapataã pinihta ne baaerara. ²⁶ ã jicꞥ yꞥhꞥ pa sehe mꞥrocariro yoaro sehe yoaeraja. Potõri da mꞥrocariro yoaro sehe yoaja yꞥhꞥ. Tuhsꞥ, cahmacheperiro pa sehe dota moñoroca mꞥjariro yoaro sehe yoaeraja. ã yoã duaeracꞥ Cristo yare quihõno yoã duaaja. ²⁷ ã jicꞥ mꞥrocapeina, cahmachepeina cꞥhꞥ ti pꞥacꞥrire ti buheriro seheta ti noano quihõno ti yoariro seheta yꞥhꞥ cꞥhꞥ yꞥ pꞥacꞥ mehne noaa dihtare yoapoja. ã yoãeracꞥ painare buheriro jipaihta yaba cꞥihti jieraboã yꞥhꞥ sehe.

10

“Cohamacꞥ jira”, ti nia masꞥrine ño payo dutieraha Paulo

¹ ã yoã yꞥ coyeã, ahrire masiga mꞥsa. Sã Israe masa ñachꞥsꞥma cꞥjiri panopꞥ macaina jipihina Cohamacꞥ to me curuare ñꞥ nꞥnꞥ ti wahcãã, wahãã tiri jire. ã wahãã sohãri mare co watojiri mahãihã wahãã pahã tinia wahãri jire. ² ã wahãã tina jipihina me curua mehne sohãri ma

macaa co mehne bautisarina yoaro sehe wahari jire. Bautisarina wahana Cristo yaina mari jiare ñona nija. Tó seheta tina sohãri mare bautisarina yoaro sehe wahaa, Moise cjiro yaina ti jiare ñoa nia tiri jire. ³ ã yoa tina jipihtina m̃ano macaa ch̃are ch̃a tiri jire Cohamac̃u to waare. ⁴ ã ch̃a tina jipihtina Cohamac̃u to waa co c̃h̃ure sihnia tiri jire. Tí p̃jap̃re tí core Cohamac̃u to c̃uri tãcai wijaa core sihnia tiri jire tina. Tia tãca yoaro sehe jiriro, tinare co wariro Cristo jiri jire. ⁵ Tina ã waharina ti jipach̃ta paina tina mehne macaina ñano ti yoach̃u ñ̃no Cohamac̃u sehe paỹu tina mehne macainare ñ̃u ji coaerari jire. ã jiro tinare masa marienop̃u yariach̃u yoari jire Cohamac̃u. ã yoaro masa marienop̃u ti p̃jac̃ure cohã sitea wahari jire.

⁶ ãta yoari jire Cohamac̃u tinare marine buhero taro. ã jiro tinare ñ̃u c̃u ñ̃aare mari goa p̃jaerahto c̃jhtore Cohamac̃u ã yoari jire tinare. ⁷ ã jina “Cohamac̃u jira”, ti nia mas̃urine ti ño payoriro seheta yoaena tjiga m̃usa sehe. Tí mas̃urine ti ño payorire Cohamac̃u yare ti joari p̃ui yahuro õ sehe nina: “Tina ch̃u duji sihní tuh̃s̃u, wahc̃ar̃ac̃u s̃u, bose nam̃u yoa d̃ucari jire wach̃u mas̃ure ño payoa taa”, ni joaa tiri jire panop̃ure. ⁸ Baharo paina sehe Israe masa numia mehne ñ̃ano yoari jire. Ti yoariro seheta yoeraro cahmana marine. Tina ti ñano yoari baharo c̃u dachoihta tina veintitrés mil masa yariaa wahari jire. ⁹ Ti ã wahari baharo pari turi paina Israe masa sehe Cohamac̃ure tina mehne suach̃u yoari jire. “Marine buhiri dahresi”, nia ñaa warore yoari jire. ã yoaa tirore

suach_u yoari jire. Ti ã yoari buhiri Cohamac_u agãa mehne bahca wajãri jire tinare tjoa. ã jina tina yoaro sehe Cristore yoaena tjiga m_usa “Marine buhiri dahresi”, nina. ¹⁰ Pa tehe tjoa paina ñaa quitu dahre ti tuhtich_u anjo masare wajãriro tinare wajãri jire. ã jina tina yoaro sehe yoaena tjiga.

¹¹ ã wajã dutiri jire tinare Cohamac_u marine buhero taro. Mari sehe pihtiri dacho panocã jiina jija. Mari ã jiina jich_u panop_u macaina ti ã waharire Cohamac_u joa dutiri jire marine noano buhero taro. ¹² ã jina “Noaina jija sã, Cohamac_u to ñ_uch_u”, ni tãhotuina jina, noano yoaga m_usa “Ñaaare yoari”, nina. ¹³ Mari jipihtina cãiro dãhsaro marieno cãa tahari ñaaare wacũja. ã wacũna tí ñaaare yoa duaja. Mari ã yoa duapach_uta Cohamac_u marine yoadohorucuriro jira. ã jiro tí ñaa wacũare m_usa bo masierach_u tiro sehe m_usare yoadohoro-hca. ã jiro tí ñaaare m_usa yoa duach_u ñano Cohamac_u tí ñaaare m_usare yoa duaerach_u yoarohca. To ã yoach_u tí ñaaare yoa duasi m_usa.

¹⁴ ã jina y_u cahĩina y_uhure tãhoga. “Cohamac_u jira”, ti nia mas_urine ne ño payoena tjiga. ¹⁵ M_usa noano masiina jich_u m_usare yahuja. ã jina y_u nihti cjihtire quihõno ti jich_u masiga m_usa basi. ¹⁶ Cristore ti ñahari ñamine vinore to sihnihto pano Cohamac_ure “Noana”, niri jire. To niriro seheta mari cãh_u tí core sihnina Cohamac_ure “Noana” nina, mari ya buhiri Cristo to yariarire masich_u yoana nija. To di wijaarire masich_u yoana nija. Tuhs_u, to yaina mari jia tia cãh_ure masich_u yoana nija mari. ã yoa pãore mari Cristo yaina nuha,

chuna, mari ya cjihtire to pjacu crusapu to yari-
arire masichu yoana nija. Tuhsu, to yaina mari jia
tia cãhure masichu yoana nija. ¹⁷ ã jina payu masa
jipanahta cã curi pão curire chuna jipihtina mari
Cristo yaina cã curuata jija.

¹⁸ Israe masa ti yoarire wacũga musa: Tina
wahiquirore wajãa, jũ muo waa, Cohamacure ño
payora. ã ti wari baharo cã curuaihta ti wariro
cjirore chura. ã chua Cohamacure ti ño payoare
masichu yoara tina. ¹⁹ Cohamacure ti waa chure
yahucu “ ‘Cohamana jira’, ti nia masurine ti waa
chua sehe tí waro jira”, nii nieraja. Tí chua pini-
hta wiho waro jia nina. Tí masuri cãhu wiho
waro jia nina. ²⁰ Tí chua ti yaba cjihti jiera-
pachuta tí chure chureraro cahmana. Ó sehe jira
tí. Cohamacure cahmaeraina wahiquirore wajã,
jũ muoa, Cohamacure ño payoa nierara. ã yoaa
watã sehere ño payora tina. Ti ã ño payoina
jichu tina mehne chuna watino yaina yoaro sehe
yoana nica musa cãhu. Musa ã yoachu pinihtare
ne cahmaeraja. ²¹ Santa Cenare mari yoari dachoi
mari pãhtoro Jesure wacũna tana sihnija. Mari
ã sihniina jina, watã sehere ño payo masieraja
mari. ã yoa Jesure wacũna tana pãore chuja. Mari
ã chuna jina, watã sehere ño payo masieraja
mari. ²² ¿Jesure musa mehne suachu yoa duajari
musa, pãarore musa ño payona? ¿Tiro yãdoro
tuaina jijari musa? Jierara. (ã jina noano yoaga
musa.)

Cohamacu to cahmaa dihtare yoaga

23 Õ sehe nina cãina: “Sã cahmano seheta yoa masija sã”, nina. M̄sa yoari cjiri ñaa ti jierapach̄ata tíre yoana painare yoadohoeraboca m̄sa. Tuhs̄, tíre yoana Jesure wacũ tua namoch̄u yoeraboca m̄sa painare. 24 M̄sa cahmaa dihtare yoaena tjiga. Paina sehere noano yoadohoga m̄sa.

25-26 Ch̄ua duarop̄are ch̄uare nuch̄una “¿Ahri ch̄ua mas̄rine ti duhu payoa ch̄ua jijari?” ni sinitu ñ̄ena tjiga. “Ñ̄aare yoari” nina, sinitu ñ̄aboca m̄sa. ã ni sinitu ñ̄ena tjiga. Ahri yahpa, ahri yahpai jia c̄h̄u Cohamac̄u ya jira. ã jina tí ch̄uare “¿Ñ̄aa ch̄ua jijari?” niena tjiga.

27 Jesure cahmaerariro m̄sare ch̄u dutiro to pjirocach̄u waha duana wahaga. ã wahana m̄sare to duhu payoare ch̄uga. “¿Ahri ch̄ua mas̄rine ti duhu payoa ch̄ua jijari?” ni sinitu ñ̄ena tjiga. 28 ã jina paio Jesu yairo “Ahri ch̄ua mas̄rine ti duhu payoa ch̄ua jira”, m̄sare to ni yahuch̄u tí ch̄ua pinihtare ch̄uena tjiga. M̄sare ã ni yahuriro “Ñ̄aa ch̄uare ch̄ura ahrina”, m̄sare to ni t̄hotuerahto sehe ch̄uena tjiga m̄sa. M̄sa c̄h̄u ã ni t̄hoturi nina tí ch̄uare ch̄uena tjiga. 29 ã ch̄u dutierac̄u m̄sa ya cjihtire ã nierahi. M̄sare ahrire yahuriro ya cjihti sehere tí ch̄uare ch̄u dutieraja. Tirop̄u m̄sare “Ñ̄aa ch̄uare ch̄ura ahrina”, niboca. “ã niri” nina, tí ch̄uare ch̄uena tjiga.

“Ch̄uena tjiga”, ȳu nich̄u õ sehe ni sinitu ȳhtiboca m̄sa ȳh̄ure: “¿Dohse jiro baro paioire ‘Soro t̄hoturi’ nina, ch̄uerabocari sã? 30 ¿Cohamac̄ure ‘Noana’, sã niri baharo sã ch̄uch̄u dohsearo tíre sã ch̄uri buhiri paio sãre

yahuwajabocari?” ni sinitu yũtibocã m̃sa yũhũre. ³¹ Ahri jipihtiare yahucũ õ sehe nii nija m̃sare: Dachoripe Cohamacũ to dutiriro seheta wahchea mehne chũ, sihnija, Cohamacũre masa ti ño payohto sehe. ã jina jipihtiare noano yoarucuga Cohamacũre masa ti ño payohto sehe. ³² Ne judio masare, judio masa jierainare, Cohamacũ yaina cãhũre ñano yoachũ yoarena tjiga m̃sa tinare. ³³ Õ seheta yoaja yũhũ sehe. Masa jipihinare yoadoho duaja. ã yoacũ ya cjihti waro sehere pjĩro tãhotueraja. Yũ ñano yũhdũchũ noanohca. Payũ masa sehere yoadohoja tinare pichacarpũ wahaborinare Cohamacũ to yũhdũchũ yoahito sehe.

11

¹ ã jina Cristore yũ ñũ cũrĩre yũ yoachũ m̃sa cãhũ yũhũre ñũ cũga.

Corinto macaina ti cahmachunoi numia ti yoah-tore yahuha

² M̃sare yũ buhe turiari cjirire yũ yoari cãhũre wacũ pahũoyuhca m̃sa. ã wacũna m̃sare yũ yoa dutiriro seheta yoayuhca m̃sa. ã yoana noano yoara m̃sa. ³ ã yoaina m̃sa jipachũta ahri cãhũre m̃sa masichũ cahmaja: Jipihina m̃sa ti pũhoro, Cristo jira. Tuhsũ, to namono pũhoro to manũno jira. ã jichũ, Cristo pũhoro to Pũcũro jira. ⁴ Cohamacũre siniriro to dapure mohariro sinino, to pũhoro Cristore ño payoeraro seheta yoaro nina. Cohamacũ yare yahuriro cãhũ to dapure mohano ãta yoaro nina tiro cãhũ. ⁵ Tuhsũ, to dapure mohaeraricoro Cohamacũre

sinino, to manunore ño payoeraro sehetá yoaro nina. Cohamacu yare yahuricoro cūhu to dapure mohaeraro āta yoaro nina ticoro cūhu. Ā yoaro to pjoarire wuha pahñoricoro yoaro sehetá yoara ticoro. ⁶ To dapure moha duaeraro ticoro to pjoarire saa pahño dutijaro. To ā yoari baharo to dapure buo tiro, ticoro mohajaro to dapure. ⁷ Mha sehe Cohamacu noariro, tuariro to jia tiare ñona tina sehe. Ā jia ti dapupure mohaeraro cahmana tinare. Numia sehe mha ti puhtoá jia tiare ñona. Ā jia tina numia sehe ti dapupure mohajaro. ⁸ Cohamacu munore yoaro, numino ya pjacu macano mehne munore yoerari jire. Numino sehere yoaro, muno ya pjacu macano mehne ticorore yoari jire. ⁹ Tuhsu, munore yoaro, numino yairo cjihtore yoerari jire. Numino sehere yoaro muno yacoro cjihtore yoari jire Cohamacu ticorore. ¹⁰ Ā jia numia ti dapupure mohajaro anjoa cūhu mha ti puhtoá ti jirire ti masihto sehe. ¹¹⁻¹² Cohamacu numinore yoaro, muno pjacu macano mehne yoari jire. Āta mipare muno masa bajuaro, numino pjacu masa bajuara. Tuhsu, jipihinare Cohamacu sehe yoari jire. Ā jiro muno to ji mhtaerachu numino mariaboa. Ā yoa numino to mariachu muno cūhu mariaboa.

¹³ ¿Musa basi dohse tuhotujari? ¿Numino to dapu mohaeraricoro, Cohamacu to sinichu noajari, musa tuhotuchu? Noaeraputiara. ¹⁴ Tuhsu, muno pjoa nahmo mūriro to jichu ñaa nica. Jipihtina masa ti mu sūro tíre masina. ¹⁵ Ā yoa numino to pjoa nahmo to dapure mohari cahsaro yoaro sehe jira. Ticoro pjoa nahmo mūricoro jiro noaricoro

bajura ticoro. Tí cãhure jipihtina masina. ¹⁶ MUSA mehne macariro ahrire yu yahurire to tũho duaerachu, õ sehe ni yahuihtja tirore: “Yu ni yahuriro seheta mari yoaa tia jira. Paina Jesu yaina cãhu ãta yoarucura tina cãhu. Sã ã yoarina jichu ñucu yu ni yahuriro seheta yoaga mũhu cãhu”, ni yahuihtja yu yahurire tũho duaerarirore.

Santa Cenare ti churo watoi dojomehneha Corinto macaina

¹⁷ Mipure musare ahrire yahui tai, “Noano yoaina jira”, nieraja yuhu musare. MUSA cahmachuna noano yoerara. Ñano yoara musa. ¹⁸ Õ sehe ni yahu mũhtaihtja musare: MUSA cahmachunopu cahma sayona musa basi cãa curuari tju wayuhca musa. Paina tíre yuhure ti yahuchu “Potocã tjica”, ni tũhotu cureja yuhu. ¹⁹ Æta yoayuhca musa. MUSA ã tju warina musa jichu ñuna baharo Jesu yaina waro jiina sehere masinahca mari. ²⁰ MUSA basi ã ñu tuhtiina jina musa cãnoi cahmachu chuchu tó wahaerara. Potocãta Santa Cena waro yoana nierayuhca. ²¹ MUSA cahmachuna cãina musa sahsero chu mũhcona, paina sehere jũca baachu yoana niyuhca musa. Tuhsu, sihni mũhtaina sehe cahaa wahayuhca. ²² ¿Musare musa wũhuse mariajari? MUSA wũhuseputa chu, sihniiga. Mipure Cohamacu yaina ti cahmachunore dojomehnena niyuhca musa to yaba cjihti jieraboro seheta. Tuhsu, paina Jesu yaina pjacũoinare chu maeraina sehere musa sehe bũoro yũhdũchu yoayuhca. ¿Dohse ni yahuihcari yuhu musare? “Noano yoana nina musa”, nieraja yuhu.

*Santa Cenare yoaa taa, ti churire yahuha Paulo
(Mt 26.26-29; Mr 14.22-25; Lc 22.14-20)*

²³ Mari puhtoro Jesu to chu batoarire yahure yuhure. A to yahuri baharo yuhu sehe musare tere yahu turiahi. Ti o sehe jira: Tirore nu tuhtiinare Juda to nohti namih mari puhtoro Jesucristo paore na, Cohamacure “Noana”, niyuhti. ²⁴ To a niri baharo ti paore nuha, to buheinare witiyuhti. A witiro o sehe niyuhti: “Ahrire chuga. Ahri yu pjacu jira. MUSA yaro jiborirore yariaihca. Yuhure musa wacuhti cjihtire ahrire chuga”, niyuhti Jesu mari puhtoro. ²⁵ A ti churi baharo tiro sihniri wahware na wahcano o sehe niyuhti: “MUSA naa yoari buhirire cohacu tacu yariaihca. A yoacu yu dire cohaihca. Cohamacu ‘Musare yuhduchu yoaihtja’, to niriro musachu yu yariaro mehne to niriro sohtori tiarohca. Ahri wahwai posa tiare sihnina, yu di coharire wacuna. Ahrire sihnina, yuhure musa wacuhti cjihtire sihniga”, niyuhti Jesu. ²⁶ A yoa Santa Cena macaa paore musa chuna, sihniare sihnina, Jesu mari puhtoro mari ya buhirire to yariarire nona nina musa. A norucunahca musa pu ahri yahpamu to tjua tachamu.

“Santa Cenare chu sihnina o sehe yoaga”, ni yahuha Paulo

²⁷ Santa Cenare chu, sihnina, Jesure no payoro marieno yoana, cua pisaro yoerana, to pjacure to di cohari chure bujupero sehe yoana nija mari. A yoana Jesure bujupena nija mari. To sehe yoaina buhiri tiina jira. ²⁸ A jina mari yoarire, mari jia tiare noano wacujihna. A wacuna Santa Cenare

ch_u, sihni masija mari. ²⁹ Mari puhtoro mari ya cjihtire to pjac_u to yariarire wacũno marieno Santa Cenare ch_u, sihnina mari buhiri tinahca. ³⁰ Õ sehe dihta yoayuhca pay_u m_usa mehne macaina. ã yoaa tina cãina tuaeraina, dohatiina wahayuhti. Tuhs_u, paina ti ã yoari buhiri yariaa wahayuhti. ³¹ Wiho mejeta Santa Cenare mari ch_u, sihnina, mari yoarire, mari jia tiare noano wacũna, mari ñaa yoarire duhuna tí buhirire buhiri tisi mari. ³² Mari puhtoro sehe marine tuhtira, tí buhirire marine buhiri ti dutieraro. Paina ñaina Jesure ño payoeraina buhiri tihtina dihta jira. Tina yoaro sehe marine buhiri tich_u cahmasãaerara mari puhtoro.

³³ ã jina y_u coyea, Santa Cenare ch_una tana cahmachuna, cohtasiniga m_usa coyeare. ³⁴ Tuhs_u, m_usa mehne macaina j_uca baa, ti ya w_uh_usepu ch_usinijaro. ã yoana Santa Cenare ch_una tana cahmachuna, cua pisaro yoaeraina ya buhiri buhiri tisi m_usa. Paye barore yahu duamahi m_usare. Baharo y_u basi suip_u m_usare yahuihtja tíre.

12

Cohamac_u yare mari yoahcore cũno marine yoa masich_u yoara Espíritu Santo

¹ Y_u coyea, ahrire yahu duaja m_usare. Cohamac_u yare mari yoahcore cũno marine jipihinare yoa masich_u yoara Espíritu Santo. ã jic_u tíre m_usa noano masich_u cahmaja.

² Jesu yaina jierasinina soro jia buheare taho n_un_uina jina, m_usa sehe “Cohamac_u jira”, ti nia

masurine, durucuera masurine ño payosinimare. Tíre masina m̄usa. ³ ã jiina m̄usa jirina cjiri jich̄u mip̄ure õ sehe ni yahuihtja m̄usare: “Jesu ñano wahajaro”, niina Cohamac̄u yairo Esp̄iritu to tuaa mehne ã nia nierara. Esp̄iritu Santo warore cj̄maerara tina. Tuhs̄u, “Jesu mari p̄htoro jira”, niina Esp̄iritu Santo to tuaa mehne ã niina jira tina.

⁴ Cohamac̄u yare yoa masia paȳu jira. Ti ã jipach̄uta marine yoa masich̄u yoariro sehe c̄airota jira. Tiro Esp̄iritu Santo jira. ⁵ ã yoa Cohamac̄u yare yoah̄tina paȳu jina, to yare soro sehe mari yoah̄ti c̄uh̄u paȳu jira. Tí ã jipach̄uta mari p̄htoro Jesu sehe c̄airota jira. ⁶ ã yoa Cohamac̄u yare yoa c̄uh̄u paȳu jira. Ti ã jipach̄uta Cohamac̄u marine yoa masich̄u yoariro sehe c̄airota jira. ⁷ Marine Jesu yainare Esp̄iritu Santo yoadohoro Cohamac̄u tuaare ñono nina. Õ seheta yoadohora tiro Jesu yainare jipihtinare mari noano yoadohoto sehe. ⁸ C̄ainare noano masi, yahuch̄u yoara Esp̄iritu Santo. Tuhs̄u, painare Cohamac̄u yare noano buhe masich̄u yoara tiro Esp̄iritu Santo pinihta. ⁹ ã yoa painare Cohamac̄u noano wac̄u tuach̄u yoara tiro. ã yoaro painare Cohamac̄u tuaare wara tiro. Tí tuaa mehne tina sehe dohatiinare noaina wahach̄u yoara. Esp̄iritu Santo c̄airota jiriro tí tuaare wara. ¹⁰ Tuhs̄u, tiro painare Cohamac̄u tuaa mehne yoa masich̄u yoara tiro. ã yoaro painare Cohamac̄u yare noano yahu masich̄u yoara tiro tinare. ã yoaro paina Jesu yainare buheare noano bese masich̄u yoara tiro. ã masia wat̄ino ya buhea ti jich̄u masina tina. Esp̄iritu Santo waro ya buhea c̄uh̄u ti jich̄u masina tina.

Tuhsu, painare tuhomañoeraa duserire ti durucu masichu yoara tiro. Ñ yoa tuhomañoeraa duserire durucuina ti nino sehta yahu yahdo masichu yoara tiro painare. ¹¹ Espíritu Santo cãirota jiriro to cahmano sehta marine cãinare ahri jip-ihtiare yu yahuro sehta yoa masichu yoara. Cãinare soro yoa masichu yoara. Paina cãhure soro yoa masichu yoara.

Cristo yaina jina cã curuata jija mari

¹² Õ sehe jira ahri mehne mari piti dahre yahuchu: Mari pjacu cã pjacu to jipachuta wamomacari, capari, dahpori, cahmori tí pinihta payu jira mari pjacu jia. Ñta jija mari Cristo yaina cãhu. Cristo yaina to pjacu yoaro sehe cã curuata jira. ¹³ Ñ jina Cristo yaina jina, to pjacu yoaro sehe cã curuata jija mari. Judio masa, judio masa jieraina, dahra cohtaina, dahra cohtaina jieraina, payu curuari jipanahta cãirota jiriro to pjacu yoaro sehe cã curuata jija mari. Espíritu Santo cãirota jiriro to tuaa mehne bautisarina jija mari. Ñ jina cãiroreta Espíritu Santore cãaja mari, Cristo ya curua macaina jina.

¹⁴ Mari pjacu cã pjacu to jipachuta wamomacari, capari, dahpori, cahmori tí mari pjacu jia payu jira. ¹⁵ Mu dahporo durucuri dahporo jiro, õ sehe niboã mãhure soro ni duaro: “Wamomaca jieraja yuhu. Ñ jicu pjacu macariro jieraja yuhu”, niboã. Mu dahporo ã niparota pjacu macano jirota nina. ¹⁶ Mu cahmono durucuri cahmono jiro õ sehe niboã mãhure soro ni duaro: “Capariaca jieraja yuhu. Ñ jicu pjacu macariro jieraja yuhu”, niboã. Mu cahmono ã niparota pjacu

macano jirota nina. ¹⁷ ¿Mari pjacu capariaca dihta jichu dohse tuhobocari mari? Basioeraboa. ¿Ã jina mari pjacu cahmono dihta jichu dohse wijï tuhobocari mari? Basioeraboa. ¹⁸ Tó sehe jierara mari pjacu. Õ sehe jira. Mari pjacu jiare Cohamacu to cahmano seheta cûri jire mari pjacure. ¹⁹ ¿Mari pjacu jia mariachu dohse wahaboari mari pjacu? ²⁰ Mari pjacu õ seheta jira: Cû pjacu to jipachuta mari pjacu jia payu jira.

²¹ “Mû yoadohochu cahmaeraja”, mû capariaca ni masierara mû wamomacare. ã jichu, mû dapu mû dahporire “Mû yoadohochu cahmaeraja”, ni masierara. ²² Paye mari pjacu jiare “Wiho jia curea jira”, mari nia sehere pototi cahmaja mari paye mari pjacu jia yuhdoro. ²³ Paye mari pjacu jiare “Soro jira”, mari ni tuhupanahta tíre mari pjacu jiare noano yoaja. Tuhsu, paye mari pjacu jiare mari buo tiare suhti mehne nuoja mari. ²⁴ Paye mari pjacu jiare nuoeraja mari. Tí pinine ñona, buo tieraja. Õ sehe ji dutiri jire Cohamacu mari pjacure. Mari ñoeraare mari pjacu jiare mari noano ño payoa mehne cjuaja. ãta yoa dutiri jire Cohamacu. ²⁵ ã jia mari pjacu jia ti basi cahma yoadohora, cû pjacuta to noano jihto sehe. ²⁶ ã jia mari capari ñano yuhduchu paye mari pjacu jia cûhu ñano yuhduca. Tuhsu, mari capari noaa wahachu mari pjacu jia cûhu wahcheina masa yoaro seheta noano tuhutura.

²⁷ ã jicu õ sehe nii nija musare: Mûsa sehe Cristo to pjacu yoaro sehe cû curuata jira. ã jina jipihtina mûsa to pjacu jia yoaro sehe to yaina jira. ²⁸ ã

jiro Jesu yainare mari yoadohohti cjihtire cūri jire Cohamacu marine. Õ sehe cūri jire tiro marine. Cāinare marine buhe dutiro to cū mæhtainare cūri jire tiro. Painare to yare yahuhtinare cūri jire. Painare masare buhehtinare, painare Cohamacu tuaa mehne yoahhtinare, painare dohatiinare ti yuħduchu yoahhtinare, painare masare yoadohhtinare, painare masa puħtoa jihtinare, painare tuhomahnoeraa duerire durucuhtinare cūri jire Cohamacu marine. ²⁹ Æ to cūchu jipihtina cāno potori to cūrina jieraja mari. Paina Cohamacu yare yahuhtina jierara. Paina Cohamacu buhe dutiro to cūrina jierara. Tuhsu, paina masare buheina jierara. Paina Cohamacu tuaa mehne yoaina jierara. ³⁰ Tuhsu, paina dohatiinare yuħduchu yoaina jierara. Paina sehe tuhomahnoeraa duerire durucuna jierara. Tuhsu, paina tuhomahnoeraa dueri durucua yahu yuħdoina jierara. Æ jiro cāinare mari yoahhtire cūri jire tiro. ³¹ Wiho mejeta Cohamacu yare yoa masi duana noa yuħdu sehere tuaro cahmaga musa. Jipihtia ahri yu niri yuħdoro musa cahmahti cjihtire mipare yahuihtja musare yuħu.

13

Painare noano ti cahĩhtire yahuha Paulo

¹ Masa ya duerire durucu masipanahta, anjoa ya duerire durucu masipanahta, painare cahĩerana yaba cjihti jieraja mari. Mari durucua cūhu yaba cjihti jierara. Painare cahĩerana mari durucuna, wiho waro durucuna nija. ² Cohamacu

yare noano yahu masipanahta, masa ti masierari cjirire Cohamacu yare ti buheri cjiri cãhure masi pahñopanahta, painare cahïerana yaba cjihti jieraja mari. “Ahdũ tãcũ pa sehẽpũ waha-jaro”, mari nichũ, “Potocãta mari siniro se-heta Cohamacu yoarohca”, ni mari tãhotuchũ ãta yoarohca. Cohamacure ã ni tãhotuina jipanahta painare cahïerana, yaba cjihti jieraja mari. ³Jipihtia mari yare pjacũoinare wapanahahta painare mari cahïerachũ tí mari wari yaba cjihti jierara. Tuhsũ, Cohamacu yare yoana tana mari pjacure mari jũ dutipachũta, painare mari cahïerachũ marine yaba cjihti jierara.

⁴Suaeraja painare cahïna. Tinare cahïna noano yoaja tinare. Tuhsũ, painare cahïna tinare pahsu tieraja. Mari cahïriro mehne jina “Mũ yãhdoro jiro jija”, niina jieraja mari. Painare cahïna “Mũsare masi yãhdũrcãja”, ni tãhotueraja mari tinare. ⁵Ã yoa painare cahïna tinare ño payoro mehne yoaja mari. Painare cahïna “Sã cahmano sehe yoaja. Mũsa cahmano sehe yoeraja”, nieraja mari. Tuhsũ, tinare cahïna suaeraja mari tina mehne. Painare cahïna marine ñano ti yoachũ cãhure tina mehne ã suarucueraja mari. ⁶Painare cahïna ñaare ti yoachũ ñũna wahcheraja mari. Noaa sehere quihõno ti yoachũ ñũna tuaro wahcheja. ⁷Painare cahïna ti ya buhiri ñano yãhdũpanahta tinare ã cahïrucuja mari. Painare cahïna paina sehe tinare ti yahuwajachũ tãhopanahta tíre tãho duaeraja mari. Painare cahïna “Tina ñaare yoasi”, ni tãhotuja mari tinare. Painare cahïna ñano yãhdũpanahta tinare cahï duhusi mari.

8 Painare cahma cahña ne pihtisi. Cohamacu yare masa mari yahua sehe baharo pihtia wahaahca. Tuhomahnoeraa duserire durucua cahu baharo pihtia wahaahca. Cohamacu yare masa ti buheri cjiri cahu baharo pihtia wahaahca. Painare cahma cahña sehe ne pihtisi. 9 Mipure Cohamacu yare mari masi pahño masieraja. ã jina to yare yahuna mari yahu pahño masieraja. Mari masi pahñohto dhasasinina mini. 10 ã jina Cristo ñaa marieriro to tjua tari baharo mari masi pahñonahca. “Masieraja”, ni namosi.

11 Mari masi pahñohto õ sehe jira: Nijinocã jicu nijinocã yoaro sehe durucumai yahu. Nijinocã to yoaro sehe tuhoturucumai. Bucuro wahaipure nijinocã to yoariro seheta duhunocai. (Tó seheta mari mipure “Masi pahñoeraja”, nipanahta baharopure masi pahñonahca.) 12 Ñono to noano masu bajueraro seheta mipure noano masi pahñoerasinija mari. Baharo pairore noano mari ñu masino seheta mari masi pahñonahca. Mipure mari masi pahñohto marine dhasasinina mini. Cohamacu marine to noano masi pahñoriro seheta baharo mari cahu noano masi pahñonahca. 13 ã yoana tiarore mari yoa masija mipure. Cohamacure wacũ tua masija. ã yoa marine to yuhdachu yohtore masina, mari noano cohta masija. ã yoa painare cahma cahña masija. Ahri tiaro jira pototi mari yohti. Tuhsu, painare cahma cahña, ahri puro yuhdoro yoana nija. Wacũ tuua, to yuhdachu yohtore cohtaa yuhdoro jira cahma cahña sehe.

14

Tuhomahnoeraa duseri durucuare yahuha Paulo

¹ ã jina painare cahma cahĩina jiga m̄sa. ã yoa Cohamac̄u yare m̄sa noano yoa masihtore cahmaga m̄sa. Cohamac̄u yare m̄sa yahuhti pinihtare tuaro cahmaga m̄sa. ² Tuhomahnoerari duserore durucuriro Cohamac̄u mehne dihta durucura. ã ni durucuro masa mehne durucuro nierara tiro. To ã ni durucuch̄u t̄hoā masa sehe ne t̄ho ñahaerara tirore. Masa ti masierare Esp̄iritu Santo to tuā mehne durucuro nina tiro. ³ Cohamac̄u yare yahuriro sehe masa sehere yahura. ã yahuro tiro masare yoadohoro nina. Tinare buhero nina tiro. Tuhs̄u, ti ñano ȳhd̄uch̄u tiro tinare wahch̄ech̄u yoara. ⁴ Tuhomahnoerari duserore durucuriro c̄airota buhera. Painare buherara. Cohamac̄u yare yahuriro sehe painare Jesu yainare buhero, yoadohora tiro.

⁵ Tuhomahnoeraa duserire jipih̄tina m̄sa durucuch̄u noāboa, ȳu t̄hotuch̄u. Wiho mejeta Cohamac̄u yare m̄sa yahuch̄u pinihtare tuaro cahmaja. Cohamac̄u yare yahuriro pinihta tuhomahnoerari duserore durucuriro ȳhdoro painare yoadohora. ã jipach̄uta tuhomahnoerari duserore durucuriro to durucuare paio to yahu ȳhdoch̄u t̄i sehe pototi painare yoadohora. To durucuare yahu ȳhdoriro jiro tiro sehe painare Jesu yainare buhero nina. ⁶ Tuhomahnoerari duserore m̄sa mehne durucuch̄u paio m̄sare to yahu ȳhdoch̄u m̄sare yoadohoch̄u ȳh̄u. ã jic̄u Cohamac̄u ȳh̄u to yahurire yahuch̄u, to yare ȳu masiare yahuch̄u, payere to yare yahuch̄u

m̄sare yoadohoi nija. Tíre m̄sa t̄hohto sehe m̄sare buhec̄ m̄sare noano yoadohoi nija ȳh̄.

⁷ T̄homahnoerari d̄serore durucuriro to durucua ti putipea ti b̄ap̄t̄ea yoaro sehe jira. Carisure putina, arpare b̄ap̄t̄ena tíre mari quih̄no yoaerach̄ tí basaare painare masihto basioerara. ⁸ ã yoa cornetare putiriro surara jiro ti cahma wajãhto panore quih̄no to putierach̄ paina surara sehe ti cahma wajãhtore masisi. ã jia ti cahma wajãhto pano ti wajãhtire wamoare cahnoyueraina jiahca tina. ⁹ Tó seheta m̄sa c̄h̄re t̄homahnoerari d̄serore m̄sa durucuch̄ t̄hoa, yahu ȳhdoriro mariach̄ paina tíre ne masisi. Ti ã masierach̄ m̄sa durucua yaba cjihti jierara. ¹⁰ Ahri yahpai paȳ d̄seri durucua jica. ã jia tí d̄serire durucuina ti basi ti ã durucua noano t̄hora. ¹¹ To ya d̄serore ȳ t̄hoerach̄ ñ̄no tíre durucuriro sehe “Pa dihta macariro jira”, ni t̄hoturohca ȳh̄re. ã jic̄ ȳh̄ c̄h̄ ãta ni t̄hotuuhca tirore. ¹² ãta jire m̄sa c̄h̄ t̄homahnoerari d̄serore durucuna. Espíritu Santo to tuaa mehne tuaro yoa duamana m̄sa. To tuaa mehne ã yoa duana paina Jesu yainare m̄sa buhehti sehere tinare m̄sa yoadohohti sehere tuaro cahmaga m̄sa.

¹³ ã jiro t̄homahnoerari d̄serore durucuriro to durucua noano yahu ȳh̄dohto cjihtore Cohamac̄re sinijaro tiro. ¹⁴ T̄homahnoerari d̄sero mehne Cohamac̄re sinic̄ Espíritu Santo mehne sinii nija. ã sinic̄ ȳ t̄hotuare masi namoch̄ yoaeraja. ¹⁵ Ahrire masina, ò sehe

yoanahca mari: Espíritu Santo to tuaa mehne t̃homahnoerari d̃usero mehne Cohamac̃ure sininahca. Tuhs̃, pa tehe noano masi t̃hotu paina ti noano t̃hohto sehe ti ya durucua mehne Cohamac̃ure sinina, tí c̃h̃ure sininahca tjoa. Espíritu Santo to tuaa mehne t̃homahnoerari d̃usero mehne Cohamac̃u yare basanahca. Tuhs̃, pa tehe noano masi t̃hotu paina ti noano t̃hohto sehe ti ya durucua mehne Cohamac̃u yare basana, tí c̃h̃ure basanahca tjoa. ¹⁶ Mari ã yoerach̃u t̃homahnoera d̃useri mehne Espíritu Santo tuaa mehne Cohamac̃ure “Noariro, tuariro jira”, mari nipach̃ta paina ne t̃hoerara. ã t̃hoeraa “Tóih̃ta jira”, ni masierara. ¹⁷ T̃homahnoera d̃useri mehne Cohamac̃ure “Noana”, ni masija mari. Mari ã nia noaa jipach̃ta tíre yahu ỹh̃doerana painare buheraja mari. ã jina tinare yoadohoeraja mari. ¹⁸ Jipihtina m̃sa ỹh̃doro ỹh̃u sehe t̃homahnoeraa d̃userire durucuja. ã jic̃u Cohamac̃u ỹh̃ure ã durucu masich̃u to yoach̃u tirore “Noana”, nija ỹh̃u. ¹⁹ ã durucuriro ỹh̃u jipach̃ta Jesu yaina cahmachuina watoí ỹh̃u jich̃u, t̃homahnoerari d̃usero mehne paỹu d̃userire ỹh̃u nipach̃ta yaba c̃jih̃ti jierara. Tí ỹh̃doro masa ti noano t̃hohto sehe mahaa d̃seric̃ã ỹh̃u yahu-pach̃ta noa nina, ỹh̃u t̃hotuch̃u.

²⁰ Ỹh̃u coyea, macanac̃ã t̃ho masieraina ti jiro sehe jiena tjiga m̃sa. Wahma masa bajuaina ñaa yoaaare ti masieraro seheta jiga m̃sa c̃h̃u. Tuhs̃, b̃c̃una t̃ho masiina ti jiro sehe jiga m̃sa. ²¹ Cohamac̃u yare ti joari p̃i ñ sehe nina: “ T̃homahnoeraa d̃userire durucuinare

ahrina masare y_u yare yahu dutiitja. ã yoa pa dihta macaina ya durucua mehne y_u yare yahu dutiitja ahrina masare. Tinare ti ã yahupachuta ahrina y_u yahua t_uhosi', nina Cohamac_u mari p_uhtoro", nina Cohamac_u yare ti joari p_ui. ²² T_uhomahnoeraa d_userire durucua Jesu yainare Cohamac_u tuaare masich_u yohti cjihti jierara. Tí durucua Jesure cahmaeraina sehere Cohamac_u tuaare masich_u yohti cjihti jira. ã yoa Cohamac_u yare yahua Jesure cahmaerainare Cohamac_u tuaare masich_u yohti cjihti jierara. Cohamac_u yare yahua Jesu yaina sehere Cohamac_u tuaare masich_u yohti cjihti jira. ²³ ã yoa jipihina m_usa Jesu yaina cahmachuch_u t_uhomahnoeraa d_userire m_usa durucuch_u tíre masieraina, paina Jesure cahmaeraina c_uh_u sãa ta t_uhoboca. ã t_uhoa "Tina t_uho masieraina jira", niboca m_usare tina. ²⁴ Jipihina m_usa Cohamac_u yare m_usa yahuch_u pinihta tíre masierariro, Jesure cahmaerariro sãa ta t_uhoro, to ñaa yoari buhirire masiboca tiro. ã masino to ñaa yoarire cahyaboca tiro. ²⁵ ã jiro potocã to jia tiare to t_uhotua c_uh_ure masiboca tiro. ã yoaro Cohamac_u panoi na tuhcuca caha s_uro, tirore ño payorohca. Tuhs_u, "Cohamac_u potocãta m_usa mehne jira", ninohca tiro m_usare.

M_usa cahmachuna noano yoaga dojomehnenomarieno

²⁶ ã jic_u y_u coyey, m_usare ahrire nii nija: M_usa Jesu yaina cahmachuna cãina m_usa mehne macaina Cohamac_u yare basa duara. ã yoa paina m_usa buhe duara. Tuhs_u, paina m_usa

Cohamacu musare to buheri cjirire yahu duara. Paina musa t̄homahnoerari d̄serore durucu duara. Tuhsu, paina musa tí d̄seri durucuare yahu ȳhdo duara. Tí jipihtiare ã yoana musare t̄hoina ti noano masihto sehe tíre yoaga. ²⁷ ã jina t̄homahnoerari d̄serore musa durucuna p̄aro, tiaro tópeinata durucuga musa. ã yoana cãinata durucuga. Musa ã durucuch̄, cãiro musa mehne macariro musa durucuare painare yahu ȳhdojaro. ²⁸ Musa durucuare yahu ȳhdoriro mariach̄ musa cahmachuna jipih̄tina musa t̄homahnoeraa d̄serire durucu duaina durucuena tjiga. ã jina masa marienoi Cohamacu mehne durucuga musa. ²⁹ ã yoa Cohamacu yare yahu duana p̄aro, tiaro tópeinata yahuga musa. Musa ã yahuch̄ paina musare t̄hoina musa yahurire Cohamacu ya to jich̄ noano masijaro. Cohamacu ya to jierach̄ c̄h̄re noano masijaro. ³⁰ ã yoa Espíritu Santo Cohamacu yare pairore tói dujirirore to yahu d̄cach̄ tiro c̄h̄ Jesu yainare yahu duara. ã jiro Cohamacu yare yahu m̄htariro sehe dihta mariajaro. ³¹ ã jina jipih̄tina musa Cohamacu yare yahuna, cãinata yahuga musa jipih̄tina paina ti noano t̄hohto sehe, ti noano wahchehto sehe. ³² ã jina Cohamacu yare yahuina jina, noano t̄ho masi, noano t̄hotu dapo, durucuina jiga. ³³ Cohamacu to yaina ti cahmachunop̄ ti cahma wisiach̄ cahmaerara tiro. Dojomehneneno marieno ti noano jich̄ cahmana tiro.

Jipihtirop̄ Jesu yaina cahmachua, ò sehe yoara tina: ³⁴ Tí cahmachunoi numiare masa panoi

yahu dutierara. Tí numiare mari sehe durucu dutieraja. Cohamacu to joari pũ to niriro seheta numiare mure noano yuhtia numia jiro cahmana. ã jia cahmachunoi numia durucuea tjijaro. ³⁵ Jesu yaina ti cahmachunoi numia ti durucuchu ñaa nina. ã jiro paye barore masi duaro numino to ya wuhuputa to manunore sinitujaro.

³⁶ Ahri yu yahuhtire noano masiga mura. Cohamacu durucua yahu ducaina jierara mura. Tuhsu, to yare tuhorigina mura dihta jierara. Paina cãhu to ya buheare cãara. ³⁷ Mura mehne macariro “Yuhu Cohamacu yare yahuriro jija”, ni tuhorigino jiro ahri mure yu joari cjiri Cohamacu to dutia jichu masijaro tiro. Tuhsu, paio “Espíritu Santo to tuua mehne yoa masija”, ni tuhorigino jiro tiro cãhu ahri yu joari cjiri Cohamacu to dutia jichu masijaro tiro. ³⁸ Tíre to masi duaerachu yu joari cjirire “Potocã jierara”, to nichu tirore duhunocahga. Tãhoena tjiga tirore.

³⁹ ã jina yu coyea, Cohamacu yare yahuina mura jihtore tuaro cahmaga mura. Tuhsu, mura mehne macaina mura cahmachunoi tuhomañoeraa duserire ti durucu duachu ã durucu dutiga tinare.

⁴⁰ ã cahmachuna noano, cahma dojomehneno marieno yoaga mura.

15

Cristo to masa mjarine yahuha Paulo

¹ Mipure yu coyea, noaa buheare mure yu yahurire mure wacũchu yoa duaja. Tí buheare noano cahmare mura. ã cahmana tí buheare ã yuhtirucure mura. ² Mura ã cahmachu tíre mura

ã yuhtirucuchu Cristo musare pichacahu waha-
borinare yuhduchu yoa tuhsure. MUSA ã tuhori
baharo Cristo yare musa duhunocachu tí musa
tuhori cjiri yaba cjihti jierara.

³ Õ sehe ni yahu muhtaihtja musare. Ahri wiho
waro jierara. Musare buhesu yuhure Cristo to
yahuri cjirire musare õ sehe ni yahui: Cohamacu
yare ti joariro seheta mari ñaa buhirire Cristo
yariari jire. ⁴ ã yoa Cohamacu yare ti joariro se-
heta Cristo to yariari baharo paina to pjacu cjirore
copare ti duhu payori baharo tia dacho jiboroi
tiro masa wijaari jire. ⁵ Tiro to ã masa wijaari
baharo Pedrore bajuari jire. To ã bajuari baharo
to buheinare bajuari jire tjoa. ⁶ To ã bajuari ba-
haro cã tahata quiniento bui jinare to yainare tiro
bajuari jire tjoa. Cãina tirore ñurina cjiri mipure
yariarina cjiri jira. Ti ã jipachuta payu tina mehne
macaina cjiri mipure jisinina. ⁷ Baharo Cristo
Santiagore bajuari jire tjoa. ã to bajuari baharo
jipihtina to buhe duti to cürinare bajuari jire tjoa.

⁸ Jipihtina painare to bajuari baharo yuhu
cãhure bajuare tjoa. Wihãrirocã to quihõri dachoi
masa bajuerarirocã to masa bajua nãnu tiri-
ro se-
heta yuhu cãhu Jesure wacũ tua nãnu tiri-
ro jija. Yu ã jiri-
ro jichu ti baharopu bajuare Jesu yuhu
cãhure tjoa. Yuhureta tiro bajua batoare juna.
⁹ Panopure Jesu yainare ñano yoamai. ã yoariro
cjiro jicu paina Jesu to cürina jipihtina ti docapu
waro jija yuhu. ã jicu mipu cãhure Jesu buhe
duti to cüboriro jieramaja yuhu, yu tahotuchu. ¹⁰ ã
jipaihta Cohamacu yuhure to cahichu mipure Jesu
to cüriro jija yuhu. ã jicu tiro yuhure to cahichu

mipure to cahmaare yoa pahñoja. ã jicu yuhure to cahĩchũ to yairo ã jinocai nieraja. Jipihtina paina to cĩrina yũhdoro yũhũ sehe tuaro buhei. ã buhecũ yũ mũ sũro buherahi. Cohamacũ yuhure cahĩno yũhure yoadohore. ¹¹ Yũhũ sehe ahri buheare yũ buhechũ tũhorina jiboca mũsa. O paina sehere tũhorina jiboca mũsa. ã jipachũta yũhũ, yũhũ mehne macaina cũhũ cũno potori ahri buheare buheja sã jipihtina Jesu to cĩrina. ã sã buhechũ tũhona mũsa sehe ahri buheare noano tũhore.

Yariarina cjiri ti masa mũjarine yahuha Paulo

¹² Cristo to yariari baharo to masa mũjarine sã buhepachũta “Yariarina cjiri ne masa mũjaerara”, nina mũsa mehne macaina cãina. ¿Dohse jiro baro ã nijari tina tíre? ¹³ ã jiro yariarina cjiri ti masa mũjaerachũ Cristo cũhũ ne masa mũjaeraboa. ¹⁴ ã yoa Cristo to masa mũjaerachũ noaa buheare sã yahuri cjiri ne yaba cjihti jieraboa. To masa mũjaerachũ tirore mũsa wacũ tuaa cũhũ yaba cjihti jieraboa. ¹⁵ Masa mũjano mariachũ sã sehe Cohamacũ yare mahñoona niboa. Yariarina cjiri ti masa mũjaerachũ Cohamacũ sehe Cristore masa mũjachũ yoaeraboa. To ã yoaerachũ “Cohamacũ Cristore masa mũjachũ yoari jire”, sã nina mahñoina jiboa sã. ¹⁶ Yariarina cjirire Cohamacũ masoeraro, Cristo cũhure tiro masoeraboa. ¹⁷ ã jiro Cristo to masa mũjaerachũ tirore mũsa wacũ tuaa yaba cjihti jieraboa. ã yoa mũsa ñaa yoari buhiri buhiri tiina jisniniboa mũsa. ¹⁸ Masa mũjano mariachũ Cristo yaina cjiri yaria mũhtaina cjiri pichacapũ waha tuhsũboa. ¹⁹ Cristore mari wacũ

tuari baharo mari yariana masa m̄ja masierana jipihtina paina masa ȳhdoro p̄jacoina jiboa mari sehe.

²⁰ Potocāta Cohamac̄ Cristore masa m̄jach̄ yoari jire. Cristo to masa m̄jari baharo mari c̄h̄ yarianap̄ masa m̄jahtina tjija. Tiro ã masa m̄jano, marine s̄ho masa m̄ja m̄htariro jira. ²¹ Ō seheta jira ahri: Adão mehne masa yaria d̄caha. Tó sehe Jesu mehne yariarina cjiri masa m̄jaahca. ²² Adão yaina ji n̄n̄ tiinap̄ mari jipihtina yarianahca. Tó seheta Cristo yaina mari jich̄ mari yariari baharo marine masa m̄jach̄ yoarohca Cohamac̄. ²³ Cãa curuari Cohamac̄ to quihõriro m̄ s̄ch̄ masa m̄jaahca. Cristo marine s̄ho ji m̄htariro masa m̄ja m̄htari jire. Baharo tiro ahri yahpap̄ to tjua tach̄ mari to yaina c̄h̄ masa m̄janahca. ²⁴ Tí p̄jata pihtiri dacho jirohca. ã jiro jipihtina ñaina p̄htoare, dutiinare, tuainare cohãno Cristo ȳhd̄carohca. To ã yoari baharo jipihtina bui to p̄htoro to jirire Cristo wiarohca Cohamac̄ to P̄c̄rore. ²⁵ To wiahto pano to P̄c̄ro Cristore ñ̄ tuhtinare to ȳhd̄ca pahñohto pano Cristo pinihta jipihtina bui p̄htoro jirohca. ã jirota jiro cahmare tirore. ²⁶ Tirore ñ̄ tuhtinare to ȳhd̄cari baharo, yariaro c̄h̄re cohã batoarohca tiro. Yariaro pih̄tia waharohca. Pari turi yariasi masa. ²⁷ Jipihtina bui dutihtiro cjihtore c̄ri jire Cohamac̄ Cristore. Jipihtia p̄ro c̄h̄re c̄ri jire tirore. ãta nina Cohamac̄ yare ti joari p̄i. Cohamac̄ sehe tirore c̄riro jira. ã jiro “jipihtina bui dutihtiro cjihtore c̄ri jire tirore” nino, “Cohamac̄ bui dutiriro

jira tiro”, nino nierari jire to yare ti joari p̄i.
²⁸ Jipih̄tina bui dutiriro Cristo Cohamac̄u mac̄no to jich̄u Cohamac̄u tirore c̄ūro sehe to mac̄no bui dutiriro jirohca. Ā jiro Cohamac̄u sehe jipih̄tina bui p̄h̄toro waro jira. Jipih̄tia p̄ro c̄h̄u jira.

²⁹ ¿Masa m̄jano mariapach̄ta dohse yoa paina masa yariarina cjiri ya c̄jhtire ti bautisarina jiri-jari? Yariarina cjiri masa m̄jaerach̄u ti ya c̄jhtire paina bautisarina ti jich̄u tí yaba c̄jhti jieraboa.

³⁰ Sã sehere sã buheri buhiri dachoripe paina sãre ti ñano yoa duach̄u cua nina sã c̄h̄ure. Sãre ã cuapach̄ta masa m̄jano to jich̄u masina ã buherucuja sã. ³¹ Ȳu coyea, mari p̄h̄toro Jesu-cristo yaina m̄sa jich̄u tirore wac̄u tua namoina m̄sa wahach̄u ȳh̄u sehe tuaro wahche t̄hotuja m̄sare. Tí potoc̄ta jira. Ā yoa, “Dohse jiri n̄m̄i ȳh̄ure yariahto cua nina”, ȳu nich̄u tí c̄h̄u potoc̄ta jira. ³² Efeso macaina suaina noaa buheare ȳu buheri buhiri ȳh̄ure tuhti, c̄j̄hre. Masa m̄jano mariach̄u Jesu yairo ȳu jierach̄u, ȳu ã ñano ȳhd̄ari yaba c̄jhti jieraboa. Wiho waro ñano ȳhd̄i niboa ȳh̄u. Yariarina cjiri ti masa m̄jaerach̄u õ sehe niboa mari: “Baharo curero yarianahca. Dohse wahasi mari. Ā jina ch̄u sih-nijihna. Mari m̄ s̄ro yoajihna”, niboa mari.

³³ Mahñoare t̄hotuena tjiga m̄sa. “Ñainare piti tina, noaa m̄sa yoaa tiare duhunahca m̄sa”, nina masa. Tí potoc̄ta jira. ³⁴ Noaare t̄hotuina jiga m̄sa. Tuhs̄u, noaare yoaina jiga tjoa. Ā yoa ñaare yoa namoena tjiga tjoa. C̄ina m̄sa mehne macaina sehe ne Cohamac̄ure masierara. M̄sa b̄o tihto sehe m̄sare ã nija.

Yariarina cjiri masa m̄jaina ti p̄jac̄ri c̄jhtire yahu namoha Paulo

³⁵ ã yoa m̄sa mehne macariro õ sehe ni sinituboca ȳh̄re: “¿Dohse yoa yariarina cjiri masa m̄jaahcari? ¿Dohse jia p̄jac̄ri masa m̄jaahcari?” ni sinituboca. ³⁶ ã sinituriro t̄ho masierariro seheta bisiro coa tara. Toari yapare mari toari baharo tí yapa baro cahach̄ waro dura. Tó sehe wahaeraro ne dusi. Tíre masina m̄sa. ³⁷ B̄c̄ yuc̄p̄re toeraja mari. Pja yapari dihtare toaja mari. Tí yapari trigo yapari jia ji, o paye yapari baro jia jiboca. ³⁸ Tí yaparire mari toari baharo Cohamac̄ to cahmariro seheta tí yaparire b̄c̄ m̄jach̄ yoara. ã yoaro mostaza yaparire mostaza yuc̄ wahach̄ yoara tiro. Trigo yaparire trigo yuc̄ wahach̄ yoara. ãta du dutira Cohamac̄. ³⁹ Jipihtina p̄jac̄ri c̄no potori bajuerara. Masa p̄jac̄ri sehe c̄no sehe jira. Wahiquina p̄jac̄ri c̄h̄ soro sehe bajura. Minichahca p̄jac̄ri c̄h̄ soro sehe bajura. Wahi c̄h̄ soro sehe p̄jac̄ri tira.

⁴⁰ ã yoa m̄ano macaa poca c̄h̄ soro sehe bajura. Tuhs̄, ahri yahpa macaina c̄h̄ p̄jac̄ tira. ã yoa m̄ano macaina p̄jac̄ri soro sehe bajura. ã jia ahri yahpa macaa m̄ano macaa yoaro sehe jierara. ⁴¹ Õ seheta jira. S̄ dacho macariro si sitera. ã yoa ñami macariro c̄h̄ soro jira. Potota buhriara. Tuhs̄, ñahpichoha poca c̄h̄ soro sehe bajua si sitea c̄jara. Ñahpichoha poca peri c̄h̄re mari ñ̄ch̄ c̄a poca p̄jiroca sia poca bajura. ã yoa paye poca tuaro sia poca bajura. ⁴² Tó seheta jira yariarina cjiri ti masa

mujachu. Masuno to pjacure mari yari baharo to pjacu baa waharohca. Baharo pa pjacu soro jiri pjacu jipihtia dachoripe catihti pjacu masa mujanohca. ⁴³ To pjacure mari yachu yariariro cjiro pjacuo nina. Cohamacu tirore to masochu to pjacu noa yuhduari pjacu jira. Tuhsu, to pjacu mari yari pjacu wiho jiri pjacu jira. Cohamacu tirore to masochu pinihtare to pjacu wiho jiri pjacu jieraro, tua yuhduara. ⁴⁴ Ahri yahpa macari pjacure mari yachu tiro yariariro cjiro to masa mujachu to pjacu mmano macari pjacu jirohca. Ahri yahpa macari pjacure mari cjana, mmano macari pjacu cahure cjanahca, masa mjana.

⁴⁵ O sehe ni yahura Cohamacu yare ti joari pui: “Ahri yahpai ji mhtariro Adao wama tiriro catiriro wahaa tiha”, ni joaa tiha. To a jipachuta Adao yoaro sehe jiriro bato tiriro Cristo sehe catiare waro tari jire. ⁴⁶ Ahri yahpa macari pjacu ji mhitari pjacu jira. Baharopu mmano macari pjacu jirohca. ⁴⁷ O seheta jira: Ji mhtariro Adao sehe ahri yahpa macariro dihta mehne to yoari pjacure pjacu tiri jire. To baharo tariro, Cristo sehe manopu tari jire. ⁴⁸ Dihta mehne ti yoari pjacu ti mhtariro to jiriro seheta jipihtina paina dihta mehne to yoari pjacu tiina jija mari. A yoa manopu tariro yoaro seheta to yaina jipihtina to yoaro sehe pjacu tiina jinahca mari. ⁴⁹ Dihta mehne to yoari pjacu tiriro Adao yoaro sehe bajuja mari. Baharo mmano macariro Cristo yoaro sehe bajunahca mari.

⁵⁰ Yu coyea, musare ahrire yahu duaja: Ahri yahpa macari pjacu di mehne, dihi mehne

jiri pjacu puhtoro Cohamacu to suho jiropure manopure ne wahasi. Mari pjacuri baahti pjacuri jira. A jia manopu jipihtia dachoripe mari jhtopure ahri pjacuri wahasi. ⁵¹ Panopure masa ti masierari cjirire mipure musare yahu duaja: Mari mehne macaina caina yarias. A jina dolicata, mari pjacurire cohtotaina jinahca. ⁵² Corneta to puti batoari dachoi ata waharohca marine. Dolicata, mari capari wihmitjiã mari nu pjõorocarõ sehe õ sehe waharohca. Corneta to bisiri baharo yariarina cjirire Cohamacu masonohca jipihtia dachoripe mari jhtina cjihtire. Tuhsu, mari pjacurire cohtotaina jinahca mari cãhu. ⁵³ Mari pjacurire to cohtotachu to pano mari baahti pjacuri ti jipachuta mari cohtotari baharo ne baasi. A yoa mari pjacuri ti cohtotachu to pano mari yariahti pjacuri ti jipachuta ne yarias. ⁵⁴ Mari bahti pjacuri ne baerahti pjacurire cohtotarohca. A yoa mari yariahti pjacuri a jirucuhti pjacurire cohtotarohca. Marine to a cohtotachu panopu to joariro seheta a waharohca: “Ñaina mari jiri buhiri tiare Cristo to cohã pahñori baharo, Cohamacu yariarore cohãnocari jire. ⁵⁵ Ne pari turi mari yarias. A jina yariato mehne pari turi ñano yuhdusi mari”, ni joaa tiri jire panopure. ⁵⁶ Mari ñaa buhiri jichu pinihta yariaropu ñano yuhdunahca. A yoa Cohamacu dutia Moise cjirore to cõri cjirire mari masiri baharo, buhiri tija mari. A jiro marine pichacapu waha dutira Cohamacu dutia. ⁵⁷ To a dutipachuta mari puhtoro Jesucristo sehe marine pichacapu wahaerachu yoara. To a yoariro jichu masina Cohamacu mehne wahche

“Noana”, nija mari.

⁵⁸ Ñ jina y_u coyea, y_u cahĩna, Cristore wacũ tua duhuena tjiga. Ñ yoana paina m_usare noaa buheare ti cohã dutich_u, ne cohãena tjiga tíre. Ñ yoa dachoripe mari p_uhtoro Jesucristo to yoa dutirire noano yoarucuga m_usa. Mari p_uhtoro Jesucristo yare mari yoach_u, ahri wiho waro jierara. Ahrire masina to yoa dutirire noano yoarucuga m_usa.

16

Painare Jesu yainare Corinto macaina niñeru ti wahtire yahuha Paulo

¹ Mip_ure painare Jesu yainare m_usa niñeru wahtire yahu duaja m_usare. Galacia yahpa macainare Jesu yainare y_u dutiriro seheta m_usa cãh_u yoaga. ² Somanaripe domingo jich_u jipihtina m_usa Jesu yainare wahti cjihti niñerure mahanocã waga. Mahanocã cj_uana mahanocã waga. Ñ yoa pji curero cj_uana pji curero waga. Somanaripe m_usa ã yoach_u m_usa cahap_u y_u s_uch_u m_usa warocah_uti cjihti niñeru ji tuhs_urohca. ³ M_usa wahtire, m_usa warocahtina cãh_ure yahuri pũre joaihtja. Ñ jic_u m_usa cahap_u s_uc_u tí pũre Jerusalẽp_u wahtinare m_usa beserinare waihtja. Ñ wa tuhs_uc_u Jesu yainare m_usa warocari niñerure nahtina cjihtire tinare warocaihtja Jerusalẽp_u. ⁴ Tí macap_ure y_u yoah_uti jich_u yah_u cãh_u wahaihca. Y_u ã wahach_u yah_u mehneta tina wahaahca.

To tinihto cjihtore yahuha Paulo

⁵ Macedonia yahpa macainare masa boca yahd_uihca yah_u tinare. Y_uhd_u wahcã, m_usa cahai

Corintop_u saihca. ⁶ Tóp_u s_uc_u m_usa mehne mahaa dachoricã jiboca y_uh_u pa tehe nic_u. Yoa cureri pja puhiro puro m_usa mehne jiboca y_uh_u. ã jina pa seher_u y_u wahach_u m_usa cãh_u y_uh_ure yoadohoroca masina. ⁷ Mahaa num_uricã ji duaeraja y_uh_u m_usa mehne. ã jic_u Cohamac_u cahmach_u yoa cureri pja m_usa mehne jiihtja y_uh_u. ⁸ ã ji duapaihta Pentecoste bose num_uri jich_u Efesoi jisiniihca y_uh_u. ⁹ Õi Efesoi mip_ure mari p_uhtoro Jesu yare t_uho duaina pay_u jira. Ti ã t_uho duach_u tinare yahuja. Y_u ã yahuch_u y_uh_ure ñ_u yabiina pay_u jira.

¹⁰ Timoteo y_u yoaro seheta mari p_uhtoro yare yoara. To ã yoariro jich_u m_usa cahap_u to s_uch_u noano mehne tirore piti boca, tiro mehne noano wahchea mehne jiga m_usa. ¹¹ ã yoana tirore ñ_u yabiro marieno noano mehne piti bocaga m_usa. Tuhs_u, to coha sitich_u noano mehne tirore yoadohorocaga y_u cahap_u to tjua tach_u. Tiro paina Jesu yaina mehne ti tahtore cohtana nija sã. ã jina noano mehne yoadohorocaga tinare.

¹² Apolo mari coyero Jesu yairo m_usare to ñ_uno wahach_u tuaro cahmamahi. ã jic_u tirore waha dutimahi paina Jesu yaina mehne to wahahto cijhtore. Y_u ã waha dutipach_uta mip_ure tiro waha duaerare. ã jiro baharo tirore yoaa mariach_u m_usa cahap_u waharohca tiro.

Paulo noa duti batoaha

¹³ Noano wac_u masiga m_usa. Cristore wac_u tua duhuena tjiga m_usa. Ne cuieraina jirucuga m_usa. ã yoa Cohamac_u tuaa mehne wac_u tuaina

jirucuga m̄sa. ¹⁴Dohse jiare m̄sa yoana, painare cahña mehne tíre yoaga m̄sa.

¹⁵Mip̄are ȳh coyea m̄sare ahrire yahu duaja: Estéfana ya w̄h̄h̄ macaina Acaya yahpa macaina noaa buheare t̄ho m̄htaina, ti ya yahpai Cristore wacũ tua m̄htaina jire tina sehe. Tuhs̄h̄, painare mari coyeare Jesu yainare noano yoadohorucure tina. Tíre m̄sa masina. ¹⁶Tina yoaro sehe j̄inare, paina Cristo yare yoadohoinare m̄sa noano ȳhtich̄h̄ cahmaja ȳh̄h̄. ¹⁷Estéfana, Fortunato, Acaico c̄h̄h̄ ȳh cahap̄h̄ wihi tuhs̄h̄re. Ōi ti jich̄h̄ pj̄iro mehne wahcheja ȳh̄h̄. M̄sa mariach̄h̄ m̄sare tuaro wacũi nimahi ȳh̄h̄. Ā jic̄h̄ tina ti wihich̄h̄ wahcheja ȳh̄h̄. ¹⁸Tina mehne jic̄h̄ noano yajeripohna tiriro wahahi ȳh̄h̄ m̄sa c̄h̄h̄ tina mehne m̄sa wahcheriro sehet̄a. Tinare noano ño payoa mehne t̄hoga m̄sa. Ā yoa paina tina yoaro sehe j̄ina c̄h̄h̄re ño payoa mehne t̄hoga.

¹⁹Asia yahpa macaina Jesu yaina m̄sare noa dutira. Ā yoa Aquila, Priscila, ti ya w̄h̄h̄i cahmachuina mehne Cristo to cahña mehne m̄sare pj̄iro noa dutira. ²⁰Ō macaina Jesu yaina jipih̄tina m̄sare noa dutira. M̄sa mehne macainare noano mehne piti bocasinia.

²¹Ȳh̄h̄h̄, Paulo ȳh basi ahri dihtare joaja. M̄sare noa dutija.

²²Mari p̄htoro Jesucristore paio to cahñerach̄h̄, Cohamac̄h̄ tirore buhiri dahrejaro. Mari p̄htoro cjero tjua tajaro.

²³Ȳh̄ coyea mari p̄htoro Jesucristo m̄sare jipih̄tinare to cahña mehne noano yoajaro. ²⁴Ȳh̄h̄h̄

Jesucristo yairo jicꝝ, to yaina mꝝsa cãhꝝ mꝝsa
jichꝝ mꝝsare tuaro cahĩja.

Cohamacu Yare Yahari Tjuel New Testament in Guanano

copyright © 2007 Wycliffe Bible Translators, Inc.

Language: Guanano

Translation by: Wycliffe Bible Translators, Inc.

Copyright Information

© 2007, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guanano

© 2007, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
1f3a4366-edba-553b-a17f-bc47c9049c98